


MVSKOKE

NAKCOKV ESKERRETV ESVHOKKOLAT.



ETEN CVPOFUCE.

СЕНОВ екнв em mokken este-hunvnwv es havtes, momet hesaketvn eyupohauken 'sem vhesavtes. Momen este-hunvnwv puyvfekcv wenake havtes.

6 MVSKOKE NAKCOKV ESKERRETV.

Cehofv Eten ofvn cvpofucen ahocvtes, momet
mv ofvn este-hunvnwv hayvte huericvtes.

Ekvvnvn asosset eto hontekvs, Cehofvt komvtes.
Eto vtekat hecetv herakusvtes, en lokce hompetv
herakvtes.

Cehofv cvpofv en nvrkvpvn eto hvmken ahocvtes,
mv eto hoporrenkv herat, hvtvm holwakat kerre
kihocet omvtes.

Momen cvpofv ofv eto en lokce ocat vtekat esto-
men komet hompetskēs; momis eto hoporrenkv here
holwakat kerrat pahpetskvs, papetsken omat mv
nettv ofvn cē'let okv, Cehofvt este-hunvnwvn kicv-
tes.

Cehofv, Este-hunvnwv enhvmkusat herekot omes,
em vnicv en horkasvn hayares, makvtes. Momet
nucky sufken Cehofvt Atvmen oh wiktves; momet
entalv hvmken a em ehset vpeswv 'meteyoficvtes.
Momet entalv a em esat hokten es hayvtes.

Momen, Tokvs heyy fune tes; momet cv fune
tes; momen vpeswv vc vpeswv tes, Atvme makvtes.
Monkv hunvnwv, erken wihket, ecken wihket, hokten
epayat vpeswv hvmkuse hakvres.

Atvme Ef tepakat afvckvke heret mv Eten cvpo-
fv ofv vtehkvtes, Hesaketvmeset em vlaket etem-
punaye ocet omvtes. Momof naorketv 'feke ofv
ocvkekot omvtes, heraket omet, momet vcacvket
omet, momet Hesaketvmese vkvsymvket omvtes.

'Momis nettv hvmken Este-nekricvt, Ef em pu-
nayat, "Mv nak' lokcat hompvs," kicvtes. Momen
Ef mv eto en lokce ehsetskvs Hesaketvmese kicvte
esvtes, momet mv en lokce vpvlwv~~n~~ Atvmen emv-
tes, momen hokkolvt hompakvtes. Momof naorke-

tvt e feken em eceyvtes, Hesaketvmese mohmatskvs kicvten momakekv. Hesaketvmese vnokecvkekates; momis em penkvlvke tates, vhakvn en kacet kerra-kekvt. Momet yafken Hesaketvmese en haken po-hakof, cvpofv ofv eto ocat ofvn ēhkakvtes; momis Hesaketvmese hece tayet omvtes, en huehkvtes, momen em vlahokvtes, penkvlkv fvcfvket, naorka-ket kerrakekv. Hesaketvmese en homecet omvtes, nak' mohmatskvs kicvten momakekv. Momen mv vtekat Hesaketvmese mv cvpofv vnokeckusat vteh-kvre en komekot omvtes. Eten wolhuehcet vtoh-kvtes, momet semvkhotkv em esten vfekhonnivtes, eslafkv-cvpko fenke esen etv welvkuecvren. Atvme Ef tepaket naoriket, momet Hesaketvmese em vhakv vcakan kvcvket omvtes. Heyv naorketyt cvpofv Eten ofv vtehkvte vtohkepuecet omvtes.

EKVNV OHONVKV.

CACE, yvmvn vts; pum ekvnv estometot omat cem onvyvranis.

Cvrke toyetskat, mv omat kerrkokv, kerryat vc afvcket omes. Cvrke, estimvt ekvnv hayvte te?

Cehofvt ekvnv hayvtes, nak omvlkvn oh ocake hecetskat.

Cehofv rakke mahet omeko?

Henka, cvppuce, rakke mahet, heretv mahet omes. Cace, pum ekvnv nokoftet pukko omet omes.

Cvrke, estomahes. Estomet kerretskat haks? Este ayate ekvnv yuksv 'rorat 'ra vk taskēs komvye munkvt vntat.

. Monkos, cvppuce, mometskeko tayes. Heren yvkapetske tetaya?

Henka, cvrke, yvkapit, letkvyēs.

Hiyomen nettv omvlkvñ hvsvklatkv fvccvn ayetsken omat, hofunof ekvnv vfulotketskēs, momet pu hute hvtvm rvlaketskēs, momof ce turofv mi ayetskvte vhece emunkēs. Este sulket heyv ekvnv vfulotecvtes, perro-cukon vtehket, uehvtkv vk fullat.

Cvrke, vfulotkin omat, vc afvcket omēs. Ekvnv pvlhvmke este vpoke te?

Henka, este vpokakat vfulotet omes. Em opuvkv cahmeliket omes.

Cvrke, hvse ekvnv vfulotket ome te?

Hekos, momeko tetayes. Hofunetv mahen vfulotet omes.

Estomaten hvse yafke omvlkvñ vklatketa ome te?

Cvppuce, pum ekvnv fulotket omes, momof hvsen nere omvlkvñ arvnayes. Naken esetska? Vm pukko tes. Tokvs, cem pukkon kulke ehomvn ocvs. Hecetskes, pvlhvmket yomuckles. Mucv pukkon rvkpvlvs. Hecetskes pvlhvmket hvyayvketa on, mucv pvlhvmkat yomuckles.

Momes, cvrke, hecis. Hecvs, pukkon rvkpalyat pvlhvmke hvyayvketa on, pvlhvmket yomuckles.


Tokvs, cvppuce, pum ekvnv mv omet omes. Hvset kulke rakket omen, ekvnvt pukko rakket omes, fulotke emunket omes. Nettv ohfulleyatet hvse fvccvhakes, momen ohfulleyat elecvt nere hakes.

Cvrke, hvset ekvnv 'sen rakket ome te?

Henka, cvppuce, hvset ekvnv sen rakket omes. Cukpe-rakko-vcule sulken 'sen rakket omes. Momis hopvye mahekv, cutke omet omes.

Este catvlke hvse hvresse tepakat emekusvpakat sases. Momis fvccv herat Cehofv tylken emekusphoyvranet omes. Mvt nake omvlkvn hayvtes, Hvse nettv ohfvnkvransen hayvtes, em merretv emunkvt omekv. Hvresse kococumpv esyomat nere ohfvnkvransen hayvtes; em merretv emunkvt omekv.

Heren e vketecvkkes—Deut. 4:19. Nake vhake mekusvpatskekaret, ce turwv hvlwe vkwwapet, hvse, hvresse, vkolaswv hvlwe nake sulke ocat hecetskof, mekusvpetv, momet 'mvtotketv ce yace wites. Mvn tlvwvvlke omvlkvn Cehofvt etekvpvken emvtes.



OKETV OHONVKV.

KvsVPPETVT omes, monkv totkv rakrvken pu yaces. Hetute-rakko latkes, momof ekvvn hvteces, ue-rakko, vkhvse esyomat hetutet talvpheces.

Tasahcof, nettv cvpcvke hakēs, momet lekuthe

hakēs. Pvhet hontvke hakēs. Fuswvt hahoket, tvmecet fullēs. Eto, esse hahicet, lane hakēs.

Meske nettv cvpcvket omēs; momof hihoyet omēs. Totkvn pu yahcekos. Vpettusan pu yacet omes. Kapv honhoyan etvn kayakeyēs. Tenetket, vtoyehvttes meske ohrofvn. Cvstvle lokcakēs mesken; momen kvco, pvkanv-cate esyomakat lokcakēs.

Hiyomat pvhe-warvlke hvvkpofvn vtotkakēs. Hunvntake, momet cepanvke tis pvhe kvrkvpvre hvse en rvkpvlrice ocet omēs, momet pvhe yuknat escvkhehocet omēs. Pvhe warke estomeckvt ome haks? Rvfo hakof corakkon momet wakvn esyomen hompihocet omēs, pvhe hompvret sepekofvn.

Rvfo-hakof pvkanv, pvrko, oce-cvpkuce, aha esyomat lokcet omes.

Hetutet eto-essen elecēs, momen a pvlaktes. Eto esse seko hakēs. Rvfo-hakof nak' omvlkv̄t yuknet talakēs. Matvpomet este omvlkv̄t pvsatkvrances. Momis este herakat Tasahce etvn, Meske heretv mahen Cehofv en liketv ofvn ocakēs.

“Ekvnv like munken omat, nerkv oketv, hayo, kvsvppe, hiye, meske, rvfo, momen nettv, nere esyomat wikekares.” Gen. 8:22.

ETEMPOHETV.

ESTVN Hesaketvmese like te?

Hvlwen likes. Hesaketvmese hvsen hayvtes, mohmet hvtvm hvresse, kococumpv, nak' omvlkv̄n hahicvtes.

Hesaketvmese este hayvte te?

Henka, Hesaketvmese este hayat, nake wenahoke
fullat omvlkv hahicvtes.

Hesaketvmese heret ome te ?

Hesaketvmese heret omes, hesaketvn pu'mvtes,
pu 'hecice munket omes, nettatot nere tis.

Estimvt hompetv pu'me te ?

Hesaketvmeset pu'mes, mohmet atcvke nake he-
rake oceyat vtekat.

Hesaketvmese epu 'kerrice te ?

Henka, monkaten omat, estomet pu 'hecicvnt
oma ?

Hesaketvmese pu hece te ?

Henka, pu hece munkvt omes.

Nerē tis pu hece te ?

Nettv etvpomen pu heces.

Nak' oceyat kerre te ?

Henka; nak' estomusen oceyis kerrez.

Nak' makeyat pohe te ?

Henka, nak' vkerriceyis kerres.

Estomaten Hesaketvmese ce hayet, cv hay te te ?

Kerret, e'ncakeyvren omvtes.

Estomet e'ncakeyetat kērre te ?

Nak' makvten oh svpakleyate.

Hesaketvmese naken pu kicvte te ?

Ce feke 'somvlkv v'ncakvkes makvtes. Cen
Hesaketvmese e hocefkv ehvperkv hocelhfetskvs.
En nettv vcayecet, cen nakvlke nak' ce kican oh
huervs. Estelehetskvs.

Nak' cv kicvten oh huervkon omat, Hesaketv-
mese vn homece te ?

Henka vn homeces.

"Vhakv tohwvlvpecatskvte omvlkvn cen kypvken

vplvltvkes, mv omecice vhaky kvcatskvte, momet ce feke, cem puyvfekcvu mucvsen hayvkes, estomen ce 'lvranc haks? Aeha, Eslevlke toyatskat."

"Mv este elat es afvcketv ocvkokv, Pucase Hesaketvmese makes, momekv fulecet hesahokvkes cēmet." Ezk. 18:31, 32.



TVKOCA.

"Este enhorrv toyetskat, tvkocan oh vyvs, momet em vretvn vketecet hoporenvs," Nakcokvrakko maket os. Prov. 6:6.

Hunvnwvt ot, hoktet ot, estuce tis nakcokv oh onvyetv eyacekot, momet vtotketv estomis eyacekon omat, mvt "Este enhorrvt on" kerratskēs. Este mv omakat kerratskat sase te? Nakcokv-rakko, Este enhorrvn okat, "Tvkocan oh vyvs, momet em vretvn vketecet, hoporenvs," kicet os. Tvkoca vtot-

ke fullat hecatskyte oca? Vketecetsken omat, eco 'fvceciecēs. Hvmket oktahv ekv en rakke omvtekis cukpiket, hylket, vlece mahet es ayet os. Momet heyv oktahv er licat, fekvpvranet fekhoniyekos, momis hvtvm komvntot ayet os. Hecet liketsken yafkis, enhorrve hehcetskekos. Lopockuset omis, nak' rakrvke 'sen cvfencvket omes. Hiyomat, estomaten este en horry, "Tvkocan oh vyvs," Hesaketvmese kicet okat, kerratskes komis. Mv em vtotketvn hecet cvfencakat, momet mv enhorrvlke fullat es vlskvren oks. Momet cvfencvke fullvren emvhayvranan kicet okvtes. Tvkoca en cvfekne hecatskat vtotkvranatskat tvlkes komis. Tvkocat on omat, afvckvke mahet os, cvfencvket ok. Hesaketvmese, este yvmv ekvny oh huericat, enhorre taranen omekates. Hopuetake vtekat nak' en celaky ocvket os. Tvkoca ehute estomahen hahicaket os, estomecet omatskvres kice emvhahoye sekon. Hesaketvmeset hoporrenkv e'met os. Omvlkeyat yv tkoca en cvfencvke omēn omat, pu'fackvke mahes. Este, enhorrvt on omat, estofvn afvcikekos, momis estemerrre munkvt omes. Monkv pu'nhorrakat omvlkvñ wiket, nak' vtekan, cvfencvket celayet omvkēres, momet mvn momecēn omat, Hesaketvmese afvcecieyvres.

AFVCKE HAKETV.

AFVCKE hakety ce yace te? Afvcke hakety, Cessvs Hesaketvmese oh vksvsmvranetsket os, ce hesayecvren. Mvn mometsken omat, Hesaketvmese em estuce toyetskres, momet heren liketskres.

Hesaketvmese Eppuce Cesvs vkvsvmetvn ce mvnicvren Hesaketvmese em'pohvs, momen mv esvrakhvn Puyfekcv-Herat ce'met, Hesaketvmese em vhakv hvsvtkan ce mvhayvres. Momof mvn vcvkayetsken omat, yvmv ekvnvn aretskis, ece 'fvcke tares. Naket ce penkylehcekos. Elkv tis ce penkylehcekos, momen ce'lis, cem puyfekcvt hesake munkv tares. Afvcke munkv tares. Estofvn estemerikekos. Estofvn ehlekos. Cesvs hecet likvres. Este faccvlken hecet likvres. Esyvhiketvn ocaket vpokēs. Hesaketvmese em estvlke haketvn estimvt komen omat, em este haket omēs.

HOLWVKE OPUNVYETV.

OPUNVKV holwvke este opunvyehcetskvs. Nake holwvke a em pvlehcetskvs. Vnokeckv ofvn este ce'ncakekaten encakvs.

Cesvs pu'ncakvtet omekv, pumeu ete'ncakvkeres. Cesvs Hesaketvmese Eppuce mahusat omet, eyaskuset, momet efeke kvncapuse omet, Hesaketvmese em estuce toyetsken omat, ceme Cesvs etvpomvranetskvet omes. Momen ce naorihocis, cvpvkketv opunvkv opunahyetskvs. Nake ce kihocis, este nvfiketskvs. Hesaketvmese em estuce eyaskuset, cvpvkketkot omvtcvs.

Hesaketvmese "este eyaskusat heren huericvres, momen este eyaskusat em vyetv heren emvhayvres."

"Cem estvlke em etenrvwv nak' onvkv esarv omet 'setoh vhretskvs, momekat ece'nakuecv e catv vnrvpe huyiretskvs, vnet Cehofv toyis."

"Ce feke ofv tecvkketskvt en homehcetskvs."

Lev. 19:16, 17.

“Este vnakuecv oh laksat svnvfketcv tes, eslafkv-cvpko tes, momet re fvske tes.” Prov. 25:18.

“Estvmvn eto sekon omat, totkv aslēs; momekv estvmvn nanvkokv sekon omat, etehvnkv wikēs.” Prov. 26:20.



ESTE FEKE HOLWAKAT.

Ce feke ofv holwvyeyckv ocat kerratskes. Momen Hesaketvmese naorketv en homecet omat kerratsket omes. Momet Atvme Ef tepakat cvpofuce ofv wolhuehocvtes naorkat vrahkvn.

Monkv ceme mehenwvket omekvs, mv Hvlwe-tvlofv naorketv sahsekos komet. Monkv Hesaketvmese este naorkv em etektvnecen escehyekos. Monkv Hesaketvmese-em-estvlkeu naorkahkekos. Momet puyvfekcvu Cesvs teropotte hesahokateu naorkahkekos. Naorketv Hvlwe-Tvlofv sahsekos.

Momis ce feke holwvken ocetskes, naorketv vnokecen. Momet holwvhoken es vkerricetsket omes. Momet ce cvpvkkes, momet c'ekvsvmes. Heyvt ce feke holwvke tat kerkuecet os. Nake etv sasat kerkuecet os; ce feke holwvke tat nettv omvlkvñ. Naken estomvranetske haks? Ce feke holwakat Hwlwe-tvlofv es ayetskeko tayekv. Este naorketv vnokecakat hylwe-tvlofv seceyekot omekv. Naken estomvranetskat cem onayvyēs. Atvme en hopuetakuce vtekat efeke holwvhoken es heckvkvtet os, cenake etvpomen. Heyv ce feke holwvke ocetskat etv hahket hvsvtke hakof tvlken, Hwlwe-tvlofv eceyetske tetayes. Hesaketvmese tokat ce feke holwakat etv haykos, monkv Hesaketvmese em'pohvs CESVS KLIST vrahkvñ, Puyvfekcv Hvsatkusan atohten, ce feke holwakan cem vkueyicet feke mucvsen ce'men, nake herakat vnokece tetayen. Hesaketvmese Puyvfekcv-herat estimvt em'pohen omat, e'mvranet makvtet os, pu Hesayecv vrahkvñ. Monkv heyvt nake vfastvranetskat tot omes. Ceme e emvnicetskeko tayes. Momis Hesaketvmeset ce 'mvnicet ce feke cem eticvren em'pohvranetsket os. Hvmmaket ce mekusvpkvt omekvs. "Vc ofvn feke hvsvtken hocvtcv, Aeha Hesaketvmese, momet puyvfekcv fvccvn vc vpikvs maket."

FVCCVN PUNAHOVYVKS.

ESTOFIS fvccvn punahoyvkvtcvs. Estofvn, nak fvcceko vfastatskat, ehetv kohmatskvs, momis fvccvn punahoyvks. Monkon omat, estit cem vkvsahmvkekos. E cukwv laksat Hesaketvmese en homecet omes. Laksvlke em vpoketv vkhvse tohottoplane

totkv setenekret omvres. Hesaketvmese heyy market omes. Em opunvkv sumikekos.

Este-laksv toyetskvt en omat, Hesaketvmese merrtv em'pohvs, momen ce'mvniceñ omat, svnvcomv naorketskekaren.

Opunayetskvt omvlkvn fvccvn opunvyvs, monkon omat vcewe min ce feke cen nokkicvres.

Aeha Hesaketvmese, estuce yekcusekan emvnics, Cesvs svrahkvn. Vc vhecicvs, yv naorketv rakkat ofv cv lvtkekaren.

“Ete'n lvkisatskvs, este vculat, em vtotketv es vpvken vwickatskvtet omekv.” Col. 3:9.

“Estimvt ehkuse vnakuecv oh laksat mvn tahcit vwickares.” Ps. 101:5.

“Lakse nake kerkuecat estemerkeko huerekares, momen lakse opunayet estermerkv en kvpvkekares.” Prov. 19:5.

“Cehofa, estimvt cen cuko ofv vre taye haks? Estimvt cem ekvnhvylwe like taye haks?

“Mv mehenwe yvkapate; momet fvccetv vtotkate, momet e feke ofv mehenwv opunayate.

“E tulaswv este es opunvyecekate, momet vnakuecv nake em vhovnekate, momet vnakuecv nake holwvke kihocis 'mapohicekate. Mv este ehomv este holwvyecat vrakkuehocekot omes. Cehofv em penkvlakan vrakkuecet omes.” Ps. 15:1-4.

FO.

CEPVNVKE hoktvkucvlke enhorrakat fon ohvpyet, es én kerrvkepe tayes.

Fo yekce mahen vtotkaket omēs. Meske, hvse



asossat vpaken, sosset vtotkaket omēs. Hvso-hiyv ofv tis vtotkaket omēs, momet en hompetv e huten hericaket omēs. Mvn rvfo orof en hompetv ocakēs, en cvmpe hayvranat pvkpvke sekot omes. Mesken en hompetv hericaket, rvfon es emehakaket omēs.

E tulaswv cvpcvken ocakēs, pvkpvke es lasakat. Vnakvn hueret vketecetskēs, estomecet en cvmpe cawet omat, em etetayof e huten es vpeyēs.

E hute omvlkvñ fo rvkrakat vpike vlket omēs, mekko-hokte kihocet omēs. Mon enhorrkvket sases, vtotkvkekot. Momen rvfo orof vtotkaket vtotkvkekan sossicet omēs. Monkv heyv fo enhorrakat omvkekot, momis fo cvfencvke vtotkakat, mi omvkes.

Fo semvnole Cutev ofvn tayet omvtes, momen en cvmpe eto hauken, monkat cvto hauke tis 'svtethet omvtes. Cutev wakv-pese, momet fo-en-cvmpe tayen 'se vfystaket omvtes. Cane Paptisv vnrvwvn arof, nake hompvte hvmkat fo semvnole en cvmpe tates.

Tewe nakcokv Hesaketvmese es vkvsymkv ofvn,

Hesaketvmese em opunvkv fo-en-cvmpen es vhopayet omes.

“Hesaketvmese em penkvlkv hvsvtket omēs, oce emunkvt; Pucase em vhakv mehenwet fvcce vlket omes.

“Cvto-konaplane ’sen heren eyacvke tayet omes. Henka, cvtokunaplane herat sen herēt omēs; fo-en-cvmpe tis, momet fo-en-cvmpe hute es ocis ’sen cvmpet omes.” Ps. 19:10.

“Cem opunvkv lasvyat cvmpe mahet omes. Henka, fo-en-cvmpe ’sen cvmpe cv cukwv ’sem momes.” Ps. 119:103.

LVKCVT LVKCVPE HAYET OMES.

NAK’ omvlkv em munkv ocet omes.

Lvkcvpe oton ettihcekos. Lvkcvt hontet lvkcvpe rakko hayet omes. Vceu, telekon ettihcekos. Pvrkou etofvsken oh lokcet omekos. Vkacou kerakkon ettihcekos. Hesaketvmese hylwe estvlke, hunvntake hopuetakuce tis em munkv ocvke vlket omēs.

Momis heyvt omvlkekos. Pusuce puse rakke hakvres, yvpefikuceu yvpefikv rakke hakvres. Cepvnvke holwvyecakat hunvntake herake haye mahekot omes. Cepvnvke herakat hunvntake holwvyecvke haye mahekot omēs. Cepvnvke herake omaket fullēs, momis e feke en hecēskot omekv, holwvyecvke tis saset omēs. Momekv vculakof vyvkhvmkusen holwvyeckv vfvstakēs; momis heyvn kerret okes; mvt holwvyeckv enhvteceskv tokot omes.

Cepvnvke holwvyecakvte vculakof, hunvntake

hervekeko vlkvranuses, lvkcv lvkcvpe hayat etvponen. Heyvn okis, nake em munkv wikekon omat, ohvtvlaket vyecice munkvt svhere mahe hakēs. Hesaketvmese en herkvt e feke oh vtotke estomis, nake here ettihcekos. Mv omekon herkv vtotket omes. Monkos; este heren hahyet omof, momusen em ette heren hayet omēs. E feke fvccvn hayet omes. Momof vkerrickv tis, opunvkv tis, em vretv tis omvlkv heren hayet omēs. Heyvt Hesaketvmese em vtotketv tes.

Cepane cvpvkketsk on omat, hunvnwv cvpvkket ome witetskvres. Hvtvm hokluswv cvpvkketsk on omat, hoktvle cvpvkke heret ome witetskvres. Heren ce mvnettof vketecvs, naken ometskat, momis nake toyetskat here mahan vketecvs.

“Cem etehohsvkates; Hesaketvmese svhkopvn- esko tayes; naken este vhocvten omat, matvwvn vteloyvret okv.

“Estimvt em vpeswv vcvkvyen vhocvten omat, vpeswv aossen vhopvnketvn vteloyvres, momis puyvfekcv vcvkvye vhocvte, puyvfekcv aossen hesaketylksv sekon vteloyvres.

“Momen nake here vfvstetv es pu hotosahkates, tetaye orof, feketv pun heckvres, pu’nkvsymkekon omat.” Gal. 6:7, 8, 9.

NAORKETV LOPUCKE SAHSEKOS.

Cvrke, naket kerris, Meluce t kicvtes. Momen, Moman naken kerretska? erket kicvtes. Momen “Hvthvyvtkeise, naken vm onayet oketskat kerris; Atvmen oketskises. kicvtes. Momen, “Mehenwvts,

Atvme tis en oketskes, erket makvtes. Este-hunvnwv enhvteceskv Hesaketvmese hayvtet os. Momen Ef hokte enhvteceskv tates. Hesaketvmese nake momehcatskvs kicvten momecakvtes, momet svnvcomv vcacvkekates. Momen en hopuetakeu efeke vcacvken es heckvkekates. Pume Atvme Ef tepakat en hopuetake toyēs. Momen este vtekat mv en hopuetakets. Momen omvlkeyat hopuetake naorkvlke toyes. Momis Atvme Ef tepakat, Hesaketvmese naken momehcatskvs kicen, momecaket omvte vm onayatske taya? erke kicvtes. Momen, Henka, vntat onayvyēs, cepanat makvtes. Momet, Eto em ette celahyatskvs kicvten mamakvtes, kicvtes. Nake cem onahoyvte vkerricepetv kometskat vc afvckes, erke kicvtes.

Hiyomat, heyvn vkerricepvret kometske te? Naorketv lopucke sahsekos. Purkvlke enhvteceskv eto em ette celahyatskvs kihoce estomuse en mamakvte, naorketv cōtkus komakvtes. Momis yv naorketv rakke tates, Hesaketvmese rakke Hayvte likan vnaorketvt omekv.

Yv vn hopuetakuce toyatskat, nettv ce hesahokvat omvl' yv vkerricēpetv komatskvre te? Nake estomis, naorketv cotkusekv komet, estofvn celahyatskvs, momis nake estomis Hesaketvmese vsehvte momecetv, naorketv rakket omes. Mvn vkerricvkvtcvs.

NAORKETV.

ESTUCE heret ometsken omat, este ce kerrakat ce'nokecvke tares. Este here ce hakvre kometske te? Henka kometske oces. Momis ce feke ofvn

naket liket on omēs, ce hervre, ce 'mvn vttecat. Mv nake ce feke ofv vpikat, nak' holwvke tis momecvs, ce kicet omes. Naket ome te, ce feke vpikat? Naorketvt omes. Este ce herekos, holwvyeyeckv nak' ce kican momecetsken omat, Holwvyeyeckvt omēs. Cv-pvkke ce hayat, momet enhorren ce hayes. Holwvyeyeckvt nak' fvcceko opunvyvs ce kicēs, holwvyecetskvet on omat. Naorketvt esten opunvkv holwvken makepueces, momet horkopicēs, momen etepoyet, etelecet omes. Estofis naorketv cvpvkketvn hayes. Nake etv naorketv en holwvke omat sahsekos.

Cesvs Hesaketvmese Eppuce vlakat, etohwelepkvn oh elvranat vlaket omvtes. Mv momat naorketv pun kwpvkvren omvtes. Cesvs momekaten omat, naorketv emeyuksvsekvnt os, momen espoke estemerkv ofvn epu'totvnt os. Naorketv vnrvpvs, momet Cesvs vnokecvs, ce hesayecvrane vlakvten. Hesaketvmese cen naorketv ce feke ofv ocat, cen kwpvyecice tayen, momet heren, hvsvtken ce haye tayen, em'pohet mekusvpvs.

HOLWVYECKV MOMEN ESTEMERKV.

MELE, cepanat, erken esyomet Atvme Ef tepakan opunvyecet fullvtes. Cane en hopelkvn yicvtes. Momof estomaten yv etecvkkatskat ena ekvnv ofvn wvkechoyat kerratske haks? erket kicvtes. Momen, Vne kerris, Melet makvtes. Momof etoropus-wv em pvlatkvtes, Cane vnokecusvte vkerricat, hvkihhoke vlket omekv. Kerris, elepekv, hevv wvkecet omhoyēs; makvtes. Momis, Estomaten elet ome haks? hvtvm maket erke vpohvtes. Momof, Enokket ok' cmekat liaks? Melet kicvtes. Momen,



Enokke mahet omvnkes, momet tayen estemerrvn-
kes, kicvtes. Momis vpohetv etvn ce'mpohares.
Estoman ce cerwv Cane enokket omvt haks? kicv-
tes. Momof em vyvposketvn kerrvkekates. Momen
erket em onayvtes, Yvmv ekvnv naorketvt sekaten
omat, nake nokke sekon, elkvu sekvnt omēs, kicvtes.
Momis naorketv estemerkvranat tvlken, Hesaketv-
mese em vhakvt maket omēs. Momen elkv t heyv

estemerkv hvmkat tes, ce cerwv Cane erkvlket naorkvktet ok, elet omvtes; momet holwvyece em munkvt heckvtet omekv. Omvlkvt psvtkvranat, heyvt fvccv tes. Momet Hesaketvmese naorketv en homece tat, momet estemerricat nettv omvlkvn oh kerkuecet omēs. Yvmv ekvnv efeknokketv pun heckat vtekat pum munkv, naorkvt omekv os. Momis heyv omvl' muntalat tokot omes. Este e na elehpof, este em puyvfekcvt estemerkvranat ocet omes. Mv puyvfekcv elvte sekat, mvn estemerkvranet omes. Momen Hesaketvmese en nakcokv-rakko ofvn puyvfekcv naorkvlke vtekat estemerhoyvranet omēs, maket pun kerkuecet omēs. Afackakuset hvlwe-tvlofv vpohkekos, momis Este-nekricv hute min, mvn estofis estemerhoyet vpokvranat vpeyvres. Momekv mimv liketv senhoneckat vk hvtvphoketv ce yacvkekot omen kerrikv, emekusapv hakepatskvren cem vcahnvkvyet omes. Momet hvlwe-tvlofv min ahoyehpet, mvn estofis afvcke munkvt kakepatskvren komit okis.

CEHOFV HOPORRENET.

MELE, Cepanat, erkeu esyomvket yvkvpaket, cvpofv ofvn fullvtet, hotosakof, eto elecvn 'rvpokvtes. Momof erke herat, Hesaketvmese rakke pu Hayvte likat, nake sulken es cem onayvkis. Monkv hvtvm es ce mvhayvranvkis kicvtes.

Hesaketvmese hoporrenet omēs. Nake omvlkvn kerret omēs. Este estomet nake mucvsen Hesaketvmese em onayeko tetayes, Estofis hoporre munkvt omēs. Hvlwe-este sekon, este hunvntakeu,

hvseū, yvmv ekvnvu, kococumpvu sekof, ekvnv hahoyen, este oh vpokvranat omvlkvñ kerre tates. Yv hiyome ce kerrat etvpomusen, momof ce kerre tates, naket mucvse en sekot omepekv. Mucv nettv ceme vne tepakeye opunahoyeyat omvlkvñ kerret omēs. Momet opunvkv opunahoyeyvte vtekat omvlkvñ kerret omes, momet nake vkerriceyat tis omvlkvñ kerret omēs, momet nake vkerriceyvte vtekat, momet naken vkerricvraneyat tis. Pu hesahokat vteken omvlkvñ kerret omes. Momet yvmv ekvnv, este-hunvntake, hoktvkeu hopoetakeu oh fullate vtekat, nak' momecakvte omvlkvñ kerret omēs. Heyv nake omvlkv, momen 'sen sulkis, Hesaketvmese kerrvre en yekicekos, naket en yekcekot omekv. Naken kerreyet on omat, eme nake omvlkvñ kerret omes. Este estomet Hesaketvmese emvhayvt huereko tetayes. Nake hvmken hvtvm cem onayvkares, kerratskan heres, Hesaketvmese en nakcokv-rakko vcakat ofv, em'pohēn omat, hoporrenkv pu'metv vkvsamuset omen, pun kerkuecet omes. Hoporrenkv fvccan pu mvhayvranan mv nakcokv pu'mvtet omes. Momen nake makat omvl' mehenwv tes. En nakcokv-rakko nakcokv mehenwvts. Mv este Hesaketvmese em penkvlvke, em vtotkakat, en nakcokv ofv esetemfvccetv sulket em ocet os. Momen esetemfvccetv omvlkvvt mehenwvt omakes. Hesaketvmese esetemfvccetv heromvke este en hahicvte omvlkvñ vcayecvres. Momen este vrakkuecvkekakat vtekat nakcokv ofv esetemfvccetv mvn em ocet omes vnrvpvranat. Hesaketvmese nak' makvte momecvranat tvlkuset omes, ehelakseceko tayekv.


Hesaketvmese esetemfvccetv hayvte ohonayet heceyat, punake tokon omat, oh vkerricvraneyet omes. Momen punaket on omat, pu feke afvckvkvranaet omes, herakovres komeyet ok'. Momen Hesaketvmese nake makvte ohonayet pohen omat, pu penkv-lvkvranet omes, epu'nrvpe tis opunaye tayekv. Momet Hesaketvmese naorketv omvl', Eppuce vnokeckusat vrahkvn, pun kypicvren emekusvpvraneyet omes, momet en cvpvkke en kypvken pu hesahuecvren. Hesaketvmese em-este fvccetv vnokecakes, nake mehenwv tokat makahkekos.

Laksvlke Hesaketvmese en homece mahet omes. Este ecukwv laksat en homecet omes, momet mehenwv toko opunahoyat estemerrvkuecvres. Yvmv ekvny tis estemerrvkuecet omes. Momen ekvny hvmkateu estemerrvkuecvranat tvlkuset omes. Eme mahusat, laksvlke vtekat Este-nekricv e hute ofvt em vpoketv tares, makvtet os. Monkv yv vn hopuetake vnokecusvyat omvlkvt, heyy nake en kerkuecvyat omvl' vkerricepet e feke vte heren mehenwvn opunahoyvre te? Momet hylwe Erke likat em Pu-yvfekcv vcakat e'mvnicvren emekusvpakate!

NOKUSE.

NOKUSE ponvttv cvpvkket os, momet eto ofvn aret omes. Nokuse rakket omes, mont eto vcemket omes. Nokuse fo-semvnole em vcemket, en cvmpen en lokes. Enkususuwvn es korret, nak' yvlonkvn a cawet, papet omes. Cvpofv tis vce ocan oh ceyet, este'n nokset omes. Sukhucen hvtvm papet

omes. Nokuse em vpeswv hompetv heret omes. Nokuse hvrpe heret omes, rvfon atcvken, esse es hahoyet omes. Este fayat nokuse mvnettan en



nokkicen omat, ecket este tepoye munket, ehle tlv-kuset wiket omes.

Cusvlke em etvlofv nokuse rvkrakat tayet ful-lvtes, momet yvpefikv, wakv, este esyoman pvsatvtes.

Ahvmkv Hesaketvmese em owalv Elisvs hocef-kvt Cusvlke eme tvlofn Cvleko orof, hopuetakuce sulket asosiyet vcvkvpeyet, hocefkv holwahoken hocefakvtes, momen Hesaketvmese eyacekat nokuse-en-hoktvke hokkolen vtohten, mv hopuetakuce hol-wvyecakat pale osten hokkolohkakan pvsatvtes, Nakcoky-rakko maket os.

LOKCE HERAN HOLWAKAN TEPAKEN.

Eto en lokcen es kerreyet omes.

Eto herat en locke holwvke lokicekos.

Eto holwakat en lokce heren lokicekos.

Svtv-rakkon eseyat eto oh lokcat svtv-rakko em vpet on kerrēs.

Matvpomen estuce naken estomat kerrēs.

Cepanat horkopen omat, horkopvt on kerreyēs.

Hoktuce naket mehenwekate maken omat, mehenwvn vnokecekon kerreyēs.

Estuce herat nake herakan celayetvn komet omes.

Estuce herat Cesvs Klist Hesaketvmese Eppuce oh vkvsamet omes. Hesaketvmese vnokecat 'Eppuce elvranen emvtes, hesahuecvranet.

Estuce herat Hesaketvmese em vhaky omvlkvñ kerretvn komet omēs.

Monkv eto en lokcen es kerreyet omes, matvpomen estuce naken estomat kerrēs.

HESAKETVMSE EM-ESTE, MOMEN YVMV
EKVNV ESTEN.

YVMV ekvnv este mvrahrvkv nvcomv te? Melet erke kicvtes. Erke en cuko ofvn nakcokvn Mele hecvtes, momen este catvlke, este lvstvlke, Cusvlke tis en heckvt ocen hecvtes. Momen etv sulken hecvtes, este ohonvkv pohvte sekis hecvtes. Momen yv hoktuce nake vhake hecat es afvcke tates. Este mvrahrvkv nvcome te? maket vpohvtes. Momen erke em vyvposkat, Hokkoluses, kicvtes. Momen,

Kut! Cvrke, yv nakcokv ofvt on omat, sulke maches, Melet kicvtes. Hokkonusat 'sen hoyvnet on kerris, makvtes. Yv hoktuce vne okvyat tokon oks. Ekvnv ofv vne este hocefhuecvye tayat sen sulket omes, ekvnv hopvyvke mahis vpoket, em atcusvke tis mvrahrvkvn vchoyet, momet em punvkv tis mvrahrvkvet on, nak' makakat tis t'en kerhoyekot omes. Momis yvmv ekvnv este mvrahrvkv hokkoluses makvyat, cem onayvyēs. Hvmkat Hesaketvmese vnokecvkekot, em vtotkvkekot, e feke naorkvke hvsutke en hahoyvte sekot omes. Heyv esten, yvmv ekvnv este kihocet omes. Ekvnv vnokecvket ot, ekvnv nak' vtehkateu vnokecvket ok, Holwvyecv en hopuetaken kihocet omes. Setvne Hesaketvmese vnrapv e pucase tat naorketvu esemevpayvt ok'. Este afvckvkekot omes, ekvnv vnokecvke mahet omekv. Estofis ofv vpokvranekat kerrvket omes. Naorketv vnokecvket o estomis, naorketv em estemerretv vkvsvnrvkranat tvlkuset os. Este naorkylke nettv omvlkvn Hesaketvmeset en homecet omes. Momen este vpvlwv Hesaketvmese vnokecvke em vtotkakat tes. Efeke emvrahkuehocvtet omes, momen nake herake en homecakyte vnokecvket omes. Momet nak' holwahoke vnokecakyte en homecvket omes. Heyv este Hesaketvmese en hopuetaken kihocet omes. Hesaketvmese vnokece tat vhecicet, em merret omes. Yvmv ekvnv vtehkof vhecicet omes, momen pvsatkof, hlvwe-tvlofn es ayet os, estofis afvcket mvn vpokvkepvren. Monkv hiyomat, heyvn este mvrahrvkv hokkoluset os, yvmv ekvnv. Hesaketvmese em estvlke tokon omat, ekvnv, momet Setvne em estvlket omes. Heyv eshokkolat vm

estvlke estoman enhopoyepe haks? Mele, Hesaketvmese em estuce toyaret komis, makvtes. Momen, Momen vnewe, cepanat makvtes. Momen heyv hopuetake erke Hesaketvmese em estvlke mehenwv tate komvtes. En hopuetakuce Hesaketvmese em esten sohhonkvtkvren emekusapvtes. Momen este hvsvthvket, heraket, en sehogetv fvccvket omakvten, pvsatkof, hvlwe-tvlofn min svpehoyvren meku-sapvtes.

HESAKETVMSE EM ESTE VCACAKAT.

HVLWE-ESTE nake tat pum onayetske te? cepanat erken kicvtes. Momen estomvke tat estomusat cem onayvyēs, kicvtes. Hvlwe-este vcacvket omes. Hesaketvmese em vtotkvranan hahicet omvtes. Hesaketvmese este-hunvnwv hayekof, momen ekvnv hocvckekof, hvlwe-este hahoyvtet omvtes. Pume omvkekot omes, ena punake omvkekot omes, momen hvlwet em vpoketvt omes. Momen Hesaketvmese rakke vcakat mv hahicvte vrakkuecetv vnokecvket omes. Momen estvn vpeyvks, Hesaketvmese kicat, pfpvne mahet omes. Momet nake momecvks kicateu yekcvke mahet omes, momet Hesaketvmese nake komat kerretvn hoporrenvke mahet omes. Momis en yekcetv en hoporrenkv vtekat Hesaketvmeset e'mvtet omes. Mvt omekon omat, naken estomahkekos. Pume hvlwe-este hecēko talyet omes. Pu turwv puyvfekcvlken hecvkvranen hahoyekates, momen hvlwe-este puyvfekcvlkets, Hesaketvmeset em este hechoye ocvtes. Hesaketvmese momecvks komen este ome e hayen hecet omho-

yvtes. Momen pume hecēko taye estomis, eme pu hecvke tayes. En sulke estomuset hvlwe-este pu hecat kerrēkot omes. Momet nettv' nerre omvl' en sulke estomuset epu'fulote tat kerrēkos. Momis nake hvmken kerreyet os. Estofis Hesaketvmese e turwv ep oh renaye munkvt os. Mvn estofis pu hosvranēkot omes. Hesaketvmese em-estvlke vca-cakat em vhonkvtkv kerrēko tayet omes. Vhonkv-tkv, pum vkerrickv er ore tayat sen sulket omes. Hesaketvmese nake komat momecetv emehakovke vlket omes. Nake kicat vteken omvlkv vpeyet yi-cet omes, momen omvlkv afvckvket omes, vcacvket ok'. Hesaketvmese vrakkuecēn omat, pumeu pu 'fvckvke tares. Momen yvmv ekvnv nake koman momecēn omat, Hesaketvmese em-estvlke heceyv-res, momen puna pvsatkof, mi hvlwen pum puyv-fekecv 'rvpvkepvres.

TEWE MEKKO.

TEWE mekko ohonkv kerretv ce yacet omes, komis. Mv este-hunvnwv Hesaketvmeset vnokece tates. Momet Tewe hunvnwv orof, yvpefikvn vheci-cvtes, momet kerrekates hesake emunket mekko ha-kvranat.

Ahvmkv Tewe cvpofv ofvn en yvpefikvn vpaket arvtes, momen este-papvt nokusen tepaket vlahokvtes, momet yvpefikv hokkolen cvwakvtes. Yvpefikuce estemerrusvtes, pvsatet hompvkvravtes, momis Tewet este-papv nokuse tepakan assecvtes.

Enhvmkuset omat, este-papv nokuse tepakat



hofunekon pvsntares, komvtes, momet em penkvlekates.

Estomen Tewe penkvlekat haks? Hesaketvmese hesayece tayen kerret omvtes, hiyomet on penkvlekot omvtes. Momet Tewe este-papv nokuse tepaken pvsatvtes.

Momen hofunusof, este-hunvnwv rakke mahet Cusvlke etepoyvranet vlakvtes.

Mv omof, Tewe mekko tokates, mekko Sal hocefkv tates.

Estimvt mv este rakkat etepoyetv eyacekates, omvlkvt tayen penkvlvke tates. Mv este rakkat holwvyecet, Hesaketvmese em penkvlekot omvtes.

Tewe mv este rakkon hecat, estimvt osiyet etepoyeko tetayen kerrvtes. Momen Tewe Sal mek-

ESTE HOPORRENEKO NAKE MAKVTE. 33

kon, Aeha mekko, ce penkahlates! Vnet ahyit, mv este rakkat etepoyares kicvtes. Momis Sal mekko em punayet, mv este rakkat etepoye taye oretskekos, ce'lecvres, kicvtes.

Momen Tewe, Hesaketvmese este-papv nokuse tepakan en kvpvken cv hesayecvtet, vm vnicvres, mekkon kicvtes. Hesaketvmeset mv este rakkat enke en kvpvken cv hesayecvres, Tewe opunayat kicvtes.

Tewe, Hesaketvmese em enhonret, este rakkat etepoyvranet ayvtes.

En horre yekcat eslafkv-cvpko cufunfske tepaken cvwē tates, mont elecvranet emehakvtes. Momis Tewe cvto-svfvlkvñ cvto tepakusen ocvtes. Tewe Hesaketvmeset em vnicvret on kerrvtes, monkv eslafko-cvpko cufunfske tepakat em penkvlekates.

En suletawv ehomvn vlakof, este-rakkan vnrpvranet letkvtes. Momen cvto-svfvlkvñ cvton vpiket es nafkvtes, mohmen cvto ekvn eceyytes. Mohmen este rakkat tvk lvtiken, Tewe oh letiket, eslafkv-cvpkon a em eset, nokwvn es en tacvtes. Tewe mv este rakkat eleceko tetayvtes, Hesaketvmese yekcetvñ e'mekaten omat.

Cehofv oh vkvsymeko en nokkicvre en kvpvken hesakvtes.

Sal eppuce tepakat pvsatkof, Cusvlke Tewen mekkon hayvtes.

ESTE HOPORRENEKO NAKE MAKVTE.

TEWE mekko owalv Hesaketvmese pum oh onaye mahet omes. Heyv nake here mahet omes. Momet este nake makvte tis pum onayvtet omes, vhvmkv

este hoporrenekot nake makvte, pum onayet omes. Heyv tes, "Este hoporrenekot e feke ofvn Hesaketvmese sahsekos, makvtes." Este hoporrenekat nake estomen make tayat estimvt keriyekos. Fvccvhakeko opunvyetvt em vtotketv tes. Momekv mv tvlkusen vkerricet, lakset, nake mehenweko, hoporreneko sekat tvlken opunvyecet omes. Estimvt nake maket momecet omat, kerrvakat heret omes. Horkopvlke horkopaket omes, vkerrvlke vkerrake vlket omes. Laksvlke mehenwv onvyahkekos. Este ekvsamv nake onvkv sulecet omes, onvkv rvkrvken onayet omes, momen este hacohakv okhackvn opunayes.

Estimvt mv nakcokv esetskat emet hocackvtes maken omat, momet estimvt hoccicekates, estimvt hayekates maken omat, vkvsametske te? Mōnkos, vkvsahmetskekos. Momēt omen omat, estoman heyyv sutv vkolaswv es fvckē ocat, eto-esse tis, fuswv tis, nake ele-oste rvkrakat tis, rvro tis, canv tis, pvkpvke tis yomakat omvlkvt emet hocackvtes, hahoyekon, makvke taye haks?

Hesaketvmese sahsekos, maketv mvrahrvkv tutcenes.

Opunahoyet makaket sases, momis mv omakat sulkekot omes.

Este Hesaketvmese sahsekos, maken pohetsken omat, lvpken em vkuekekvs. Holwvyecēs, vhopvnkēs. Momis en homehcetskvs, ehvhnetskvs, momis "Em merrvs, Hesaketvmese," kicvs. Heyvn kerrvs, emekusvperekot omēs.

Vpvlwvt efeke ofvn Hesaketvmese sahsekos makakēs. Hiyomen este hoporrenekat maket okvtes.

Este momakat, Hesaketvmese sekate ! komakes. Este momakat holwvyeyeckvn em vlostvket omakēs. Mome estomis holwvyeceyat svrahkvn, Hesaketvmese pu'stemerricvres, komaket penkvlaket omakēs. Momekv Hesaketvmese ep ohfvcccecvre sekate ! komaket omēs. Hesaketvmese ehlekos, vcuhlekos, estofis wenake emunkvt omes. Momekv sekate ! komaket es vpeye estomis, like munkv tares.

Vpvlwvt em fulletvn Hesaketvmese sekos es makaket omēs, Hesaketvmese sekon omat, estomet fulle tayat ore heren fullaket omēs. Emekusvpvhkekos. Feksumketvt en cakken omat oh huehkake wites. Este mv omakat, Hesaketvmese ehvnvkeko estomis, vrvkkuecvkekot omakes. Sukkv lvkcvn pvpaket omis, vnvtkiset lvkcvpe huerat hehcekos, nake en hecke hompat, mimvt es fekhore sekot fulles; mv omaket omes, Hesaketvmese vkvsymvkeko fullat.

Hesaketvmese em vtotkvkekot, momis heyv ekv-nv, ena vpeswvn, Este-nekricvn asyomen em vtotkaket omakēs. Em opunvkv hecake estomis em en hervhkekos. Hesaketvmese vnokecvhkekos. Nake sulecetvn eyacvket omakēs, vkvsymhoyvre tis, cvtokuaww tis, vfvcvetv yvmv ekvny kice ocat esyomakat vnokecet; Hesaketvmese vnokecvkekot omakēs. En homecvke mahes. Em vhakv vfvtvhkekos. Vnaorkakvte efeke es nokkicaket, naorketv wikvhkekos. Hesaketvmese em estvlke yorecvte, este-nekricvlke tis, vkerrickv ocakat em oricvkekot omakes. Este-nekricvlke Hesaketvme likat vkvsymaket fekekaket omakēs. Momis heyv este take Hesaketvmese likes kome vkerricakis, afvckvkekot,

momet penkvlvkekot omakēs. Penkvlakuse ocen omat, lvpkusen ehosakēt omakes. Este heyy oma-
kat yvmv ekvnv tayet omēs. Nake sulke mahan kerrvkēt sases. Momis Hesaketvmese kerrvkekot omakēs, kerreyes kome, vfekhonnivketv eyacvkekot omēs. Cvtokunawv ocaket, ekvnv ocakes. Momis estemerrakuset omakēs. Cehofv ocvkekot yvmv ekvnvn oh fullet omakēs. Rakke kihocat sases, momen hvlwen kvwvpkakes, momis lvpkusen totkv-
rakko sufke herat ofvn akhvtvpecvres. Mv en svpvk-
letv senhoneckvkes. Ceme mv fullat toyetska? He-
saketvmese sekos kometsken omat, cem vretv etice-
ket vretske tayes. Hesaketvmese vnokecetsket o-
haks?


PU HESAYECV.

ATVME Ef tepakat holwvyecakekv, Hesaketvmese mv cvpofuce vtehvire en komeket omvtes, Hesake-
tvme hvsvtket omekv, momet holwvyeckv omvlkvn en homecet omet.

Atvme Ef tepakat herake hvsythakovte vnvcomvn momekates. Hesaketvmese vnokecvkekot omvtes. Momet vkerricetv eyacvkekot omvtes, holwvyecvke heret omvtes. Momen Hesaketvmese en holwvyec-
kv taken 'sen homecet omvtes.

Hesaketvmese eto em ette homipatskvs kicvten hompaken, monkat esaken omat, ce pvsvtkvranvkat tvlkus, kicvtet on kerratsket omes. Monkv Atvme Ef tepakat pvsvtkvranet ot kerrakovtes.

Mehenwvt omes, em puyvfekcv pvsvtkeko tayet omvtes, puyvfekcv estofis hesake munkvt omekv.



Momis puyvfekcv omvlkvt Hesaketvmese hylwe likat
'rvpaket vpokvranekot omes.

Liketv estepenkylecat totkv-rakko kicetvt liket
omēs, holwvyecakat em puyvfekcv vpeyvranat, esto-
fis, Puyvfekcv holwakat, momet em estvlken er vpa-
ket vpokvranat. Monkv Atvme Ef tepakat holwv-
yecakekv, mv holwvke ocan vtothoye tayet omvtes.

Momis Hesaketvmese Eppucet mv en kaketv

holwakan em oh merrvtes. Momet hvlwen a hv-tapket, momet estuce haket, momen Cesvs kihocvtes. Momet estemerket arvtes, momet tohweklepkvn oh estemerket elvtes, Hesaketvmese este en naorketvn en kvpvyecicvret. Hesaketvmeset Atvme Ef tepakan, vlvkvres, kicvtes.

Pume Atvme en hopuetakuce toyēs. Momen Cesvs tohweklepkvn elkvn 'soh estemerrvtes, pum puyvfekcvn totkv-rakko en kvpvken pun hesahuecvret. Cesvs Hesaketvmese Eppuce pu Hesayecvt omes. Oh vkvsamēt, momet vnokecēn omat, pu pvsatkof, pum puyvfekcvn hvlwe tvlofvn 'res pum orvres. Momis oh vkvsvmēkon omat totkv-rakko en hesahokeko tetayuset omes.

Hvlwe-tvlofv oh vyetv etv sekot omes.

HESAYECV ETV SEKOT OMES.

Cesvs hopuetakuce em merruset omes. Hopuetakuce em etektvnecatsken, a vc oh vwepekv, momet 'sen tvcikatskvs, mv omakatet Hesaketvmese eme tvlofv vpokes, makvtes.

Cesvs oh ayetsken omat, ce hesayecvres, kicetsk, Aeha, Hesayecv vn heretskat vn holwvyeckv omvlkvn vn kvpvyecicvs, momet vm puyvfekcvn vn hesayecvs.

ESTE-PAPV.

ESTE-PAPV ponvttv em mekkon kihocet os ; yekce mahet, fekhvmke mahet omekv.

Este-papv ekvvn lekuthan fullēs. Rvkrvket omēs, momet en nokwv-esse cvpcvket omēs, momet elekususuww rvkrvket, yekcvket omēs. E cukwv rak-


ket, e nute fvsfvket omēs. Esse oklanet, supvkhvtket hvtvm oklvste tis sases. Este-papv hehkate 'sen-honecke mahet omes.

Este-papv nere renayvt omes. Nettv omof cvto-hauke, hvfvpn esceyet, ehkaket nucicet omes. Mo-mis neren asosset uewvn oh vpeyet eskaket omēs, eskvkofvt uevv tempen elkakēs, momen eco, yvnvsv tis esketv eyacet yicof, oh tasket, ayocet elecet ppakes.

Este-papv vculof, nute en kyceken yvnvsv pvsateko tayes, momet este-lvste eme tvlofv tempen fullet, sukhv, yvpefikv tis, este tis ayocakēs. Monkv este tohopke hvlhwwen hahicet, tvlofv em vfulotken ocaket omēs. Vpvlwvt e hute eto yuksvn oh hahicet sasēs, este-papv eto acemecekot omekv.

Cusvlke em ekvnv Cotvnē hvtce tempen este-papv svsetvt omes.

Nakcokv-rakko este-papv opunvyece mahet os. Este fekhvmkvke mahe saset este-papv e feken oca-
ket os, kihocet omes. Este holwvyecvlke este este-
merhoyusat, nake svpenkvlecaket, este herakat nake
em ahopvnake fullat este-papv nake esvte komet
vketece munket ares; mvn es vhopahoyet os. Este-
nekricv pun horre omet este omvlkvt holwvyecvlket,
momet enhonrkv tis ocekot, eme omvkvren komet,
este-papv hehket arēs. "Mv omet Este-nekricv
este estomen sumecice tayat hopoyet ares," Nakco-
kv-rakko maket os. Monkv Hesaketvmese emeku-
svpvkers, Cesvs vrahkvn, heyy holwvyecv puna pum
puyvfekcv 'svpvke pu sumecice tayat en kpvken
epu'cayecvren.



RVTCE-KUPHE.

HIYOMAT rvtce-kuphe cem ohonayvranvkis. He-cvs rvtce-kuphe vhave tes.

Rvtce-kuphe nake rakket omes. Corakko 'sen hylwet omes. Ekv cōtkuset, e nokwv cvpket, kuphe rakket era oh liket omes.

Rvtce-kuphe nak-se-emvnickv heret omes; em vpeswv hompetv heret omes; e pese esketv heret omes; esse kapv-hakv es hayetv heret omes.

Rvtce-kuphe kaccv, este-papv tepaket hompetv eyace elecat ohmekos. Monkos, rvtce-kuphe nettv omvl' este em vtotkat vtotketv es enhoriyekos.

Rvtce-kuphe pphen, nak-essen, tvkliken esyoman hompet omes. Rvtce-kuphe newv eskekis, nettv cahkepat aret omes.

Este sulket rvtce-kuphe ocaket Alepvlike hocef-

kvts. Rvtce-kuphe hopvye mahan vpeyet omes, momen honnen sapolicet oktahv-rakko 'sete hoyvne-hocet omes.

Alepvlke uewv ehvlewv eshokkolat svpeyaket omes. Rvtce-kuphe oktahv-rakko oh yvkvpvre ele here en hahoyvtet omes.

Alepvlke estomet oktahv-rakko ete hoyvnekot omēs, rvtce-kuphe heran ocekaten omat.

FUSWV TAFV HERE.

HEYVT fuswv rakke mahat vhaket os. Uehatkv tvpalvn ekvnv hiyan fullet omes, momen Wahvlfvccv ekvnv likan lopuckuset fulles. Rakrvketvt omes, momet rvtce-kuphe omet, uewv eskekis, hofunen fullet, momet ekvnv oktahan fullet omes. En hvlwe estele-vhopakv palis sases, momet yekcvketvt omekv, este hokkolet ohkakis es letkes. En heckv lastuse, hololotcuset omes, momet e tvrpv esse e hvce tepakat hvthicet omes. Esse telēkmuset omes, momen heyy fuswv honhoyetvt omekv, tvmecekot omes. Momis corakko pvfpvne mahat sem pvfpvnet omet, fvccvn ayen omat, naket cvkikekos, momis hoporrenvkekot omet, kololuecet fullen, cakket psvthoyet omes. Heyv fuswv oktahan korret, em puknvkv hayaket omes, momen sulket em puknvkv hvmkusis etem oh kayaket, echustake pale cahkepen, monkat pale epakis puknvkv hvmkusat vtehet omakes. Echustake estuce ekv en rakke omaket, momet hompetv tis heret omes. E hvrpe lanvket, momet tvkvctvwet omen, uewv es esketv tis hahoyet omes.



Tafv-lvste es fulhooyvnto heyy fuswv e tafvt omes.

Nakcokv-rakko heyy fuswv opunvyecat, "Mvt echustake ekvnv ofv wiket, momet ēssu ofvn hihoyicet omes, momet elet wokuce tayat, monkat ele-oste tis tvkohlice tayat ehoset omes. Echustake enake toko omecet, vnokecekot omes.

Heyv fuswv hompetv em vlostuset omes, momet hacohakuset omekv, nake estomen em vpvlvthoyis oh tasket loket omēs.

Este mvnettvke, vculakis, Este-nekricv em vtot-

kvlke mv fusvv omaket, nake holwvyeyckv em vcahnat vtekat, oh taseket omes. Momekv mv fusvv omaket omes, eto-cvsketv tis, cvto tis, vcopy tis nokmelaket omakes, cepane okhacusis em vpvlata eme es afvcke pat tvlkuse.



UEKATCV.

UEKATCV nake esherakuset, momis cvpvkhoketes, Cusvlke em ekvnvhvlwe eto vlhekan.

En rakrvke efv rakrakat en rakke omaket omes. Momis pose omet omes. Pose omet ayopket fulles, momet etou vcemecet omes. Momet pose cesse enehakynto omet, nake emehaket oh tasket, ayocet omes.

Hesaketvmese owalv Cvlemia em onayvtes.


“Momekv este-papvt eto ofv aosset pvsvtvres, momen nere yvhvt estemerrykuecvres, momen uekatcv tvlofv vhecicen este estimvt tvlofv ossat vtekat lvtahlecvres, en naorketvt sulket ok, momen pvlke fulecakat ohvtvlaket ayet omekv.” Jer. 5:6.

Momen ahvmkv Cusvlke Hesaketvmese ehosaket, nake vhake emekusvpakof, Hesaketvmese oawlvn Hoseyvn ohtotvtes hiyomen nake en kerkuecvranen.

“6 Fycecakvtes, efeke hvlwecakvtes, momekv vne cv hosaket omakvtes.

“7 Momekv este-papv em e omecares, uekatecv omit nene tempen vketecares.

“8 Nokuse echustakuce en cvwho耶 omit vnrvpares, momet efeke ohrvnkvn lvtvhlecares, momet



mvn lokares este-papv omit; ele-oste honecatet lv-tvhlecres.” Hos. 13:6, 7, 8.

Uekatcv en hocce h̄ruset omes, lane lvslvte es
hocct omet, hololotcuset omes. Hiyomet en hoccv
cahmeliket omekv, uekatcv nake ele-oste emvrah-
kuset omes.

“Este-lvste e hvrpe etice taye haks? momekat
uekatcv en tokohle etice taye haks? Mome tayen
omat, ceme take nake holwvke vfvstetv es emunk
hayatskateu nake hēren vfvstatske tayes.” Jer.
13:23.

Pume uekatcv tokohle lvslatat ueww ’sem ok-
koseye estomis, en hoccv vslehcēkos. Momis Hes-
aketvmese en yekcetvt momece tayet omēs. Momekv
nake holwvke vfaste es emunk hayeyet omen omat,
nake here vfvstetv pun yekcet omes. Momekv He-
saketvmese emekusvpvraneyet omes, “Feke hvsvt-

ken pun hayet, puyvfekcv mehenwvn pum oh mucvsecvren.”

Heyvn ce hohsvkates, holwvke fulletvn esker ratskvten omat, yekce hēren vnrapet wikvranatsket omes. Momatskekcon omat, ece ’culakvkofvn holwvyeckvu ohvtvlaket ayvres, momet etv hakeko wites.

Hesaketvmese mekusvpvs, momat mvt cem vnicen, nake holwvke vtekat en homecet, wicket, nake here mehemwe fvcce ocan vnokecet, omvlkvn vfvste tayen ce hayvren em’pohvs.

Hesaketvmese Eppuce Cesvs Klist pu Hesayecv em vhakv este omvlkvt, tvlwavlke omvlkvt kerraket vfvstakof nettv heraket omvres. Este omvlkvt Cesvs vnokecaket, emeu etenokecaket omvret okv.

“6 Yvhv yvpefikucen vpokvres, momen uekatcv cowatucen em wakkvres; momen wakuce este-papv wakuce-neha etohkvlket lumhvres, momen estucet evpvyvres.

“7 Wakv nokuse tepaket nanopvres, echustakeu tohkvlket lumhvres, momen este-papv wakv-vtotkv omet pven pvpvres.

“8 Momen estuce pese-cokusat cetto em vhauken oh ahkopvnvres, momen estuce pese-wikusat cetto huten enke oh wvkecvres.

“9 Vm Ekvnv-hvlwe hvsatkusate vtekat ofv na- ket en nokkicekares, momet vhovnekares. Cehofv ohhoporrenkvt ueww uehvtkv ohranat omet, ekvnvn fvcecvret okv.” Hesvyy 11:6, 7, 8, 9.

Heyv okety vfackusat orvranet omes. Este Cesvs vnokecakat heyv nettv hecvranet omes. Yvmv ekvnvn heyv nake momvranen okvtes, Tvlwv cahmelike Cesvs em opunykv-hervn kerraket, vkvsymakof horre

wikvres, momet etohkvlket ete'ncakuset fullvres, ete'n hompaket fullvres. Momekv hebyn okvtes, nake 'senhoneckvken svhopayet okvtes. Tvlofv estomet Cesvs em vhakvn vfvtaken omat, estofis heyvt en cakket omes. Hiyome mv opunvkv-herv pohvkeko munke vpokakat momvkekot omakes, momis ete'n horkopaket, ete pvsvtket, ete wiyaket komis, momecaket ete'stemerrvkuecet omakes. Nake heyy omakan Cesvs em vhakv vsehet omes. Momekv mvn este kerraket vfvtakof, herkvt vlaket omes.

Momis hebyn vtekusen mv herkv sumket ome-kos. Mv Cesvs oh vkvsvmakvte ena ēle estomis, hesahoket emunkvt omvres.

NAORKETV ENKVPVKETV.

Pu feke em munkv holwvket omes, momen pume etawv tat hervken hayeko tetayet omes. Nettv hvñken fvccv heren vkerricet, momet fvccv heren nake celayetvn kometske estomis, momehcetskekos, Hesaketvmeset ce mvnicekon omat. Momen vn hesse toyetskat, Hesaketvmese cen naorketv omvl-kvn en homecet omes. Pu feke holwvhokat estomecet haks? Estomecet mvrahkueceyvre te? Estomet pun naorketv pun kpvkvr haks? Hesaketvmeset okat, cen naorketvn ce feken es nokkicvks, maket omes. Mv momeyat pu 'stemerrihocen, momet nake holwvke tis 'poh vlaket omekv, mv vrahvkn pu feke nokket omes. Efeknokketv yv omat fvccv tokot omes.

Vn hesse toyetskat, efeke-nokketv heyy omat

pum munkv tat ocekot omes, Hesaketvmese em Puyvfekcv Vcakat pum vnicet omekon omat. Momekv Hesaketvmesen Puyvfekcv Hvsvtkat pu'mvren emekusvpvraneyet omes. Pun naorketvn vnokeceye munken omat, pun naorketv pun kpvkeko munkvt omes.

Hesaketvmese emekusapetsken em Puyvfekcvn ece'pvyecicet, heyy nake ce mvhayekvs, momet ce feke holwakat ce hecicet ce kerricekvs, momen, cen naorketv ce hecicen, ce Hesayecvt cen kpvvyecicvren estofis oh hecetske emunkekvs.

CETTO.

WAHVLV Ekvnv Ekvnvfvsk 'res en hopvyen Ekv-nfvsk Rakkot ocet omes, Este-cate tvlofn.

Mvn cetto cvpcvkvet Estvkwnayv kicetvt fulles. Mv cetto en cvpke estele-vhopakv pale cahkepat 'sen hoyvnet sases. Ena eto en rakke omet omēs. E cukwv rakke mahet omēs, e nute fvsfvket, acopv 'sen rakrvket omēs. E turwv hvyayvhoket omēs.

Mv cetto elawof, nene tempen eton vcemket, lvtcen oh wakkes, momet wakv, corakko, este tis eto elecvn hoyanof, oh tasiket, wvnahyet, elehcet nokmēles, momet nokmelof hvfvpn ehket, nettv sulken wākkēs, mome mvketekof eshechoyen omat, elehocēs, e emvniceko taye hakekv.

Cusvlke em etvlofn cetto tayent fullvtes.

Cetto ohfvccv nanvke sulken nakcokv-rakko pun kerkuecet os. Momet este naorkvlke mv omvken kicet os. Momet naorkvlke em punvkv mv cetto

este akke en holwvke omēs, kicet os. Eslevlke ekvn-kvrpe tehooyvnecof, Hesaketvmesen vnaorkakvtes. Momen estemerrvkuecvranan cetto totkv omvken, a ohtotvtes akkvkvranan, momen este sulket pvsatvtes. Momen mv cetto akkat naket en wiceceko tayen hecakof, Moseskvn a oh ahwet, "Naorkēs, momet Hesaketvmese vnrvpen, momet cemeu ece'nrvpen opunahoyes," makakvtes. Hesaketvmese emekusapetsken, heyv cetto pun kvpvyecicekvs, makakvtes. Momen Moseskv este em emekusapvtes. Momen Cehofvt Moseskv em punayet, Cetto totkv omen hvys, momet eton ohtrvrs: momen ocvres, mv esto cetto akkat vtekat, mvn oh hecof, hesakvres, kicvtes.

Momen Moses cetto vhake cvto-lanen es hayvtes, momet eton ohtarvtes. Momen ocvtes, cetto este estomen akken omat, mv cvto-lane cettton hecof, hesakvtes.

Cesvs Nekotemvse emvhayof, heyv ohonvkvn opuvyecvtes, yvmv ekvnv em vtotketv oh hvyayicat. Eslevlke mv cetto akkat em wiceceko tayat etvpomen, este estomet em puyvfekcv naorketv en kvpiyeciceko tas. Monkv cvto-lane cetto oh hece hesahokvte etvpomen, naorkvlke Cesvs oh hecet, oh vkvsamat hesahokes.

14 "Momen Moseskv vnrvwv ofv cetto kvwapvto etvpomet este Echuswv kwwvpkvranaet os,

15 Oh vkvsamat vtekat estemerkekot, momis hesaketv yuksv-sekon ocvren.

16 Hesaketvmese ekvnv vnokece mahet omekv, eppuce hvmkuse heckuecvte emvtes, mvn estimvt oh vkvsamat estemerkekot, momis hesaketv yvksv-sekon ocvren."



HACKV.

ESTE-HACV toyvkares, kometsket on omat, momet yvmv ekvny ce'stemerruset hueret, momet ekv-nv hvmkeu emeyuksv sekco ce sumkvre ce yacekon omat, uehome lvhsetskvs, momet nake este hacece tayat celahyetskvs. Este eskakat vpvke vhret-skvs, momet uehome sasat oh vhyetskvs. Estomuse estomis esiketskvs. Estomusen este esket o estomis, ohvtvlaken esket vyecicen, ohvtvlaken esket vyecicet, este-haco mahhe haket omekv, celvyekot lasekot huervkat tvlkuset, mv nak' esketv homat emvnvttet hueretvt os. Nakcokv-rakkot okat, este horkopvlke, monkat este hacvlket o estomis Hesaketvmese 'metvlofv esceyekos, maket os. Hoktarkv nakvhake-mekusvpkv, porkv, homeckv, eleckv, hac-kv, mv nake mv omvke momece sasat vtekat Hesaketvmese' metvlofv escehyekos. "Horkopvlke tis, holacvlke tis, hacvlke tis, tvlke cvlke tis, monkat mvkerrvlke tis, Hesaketvmese me Tylofv escehyekos." Nakcokv-rakkot maket os.

HOTVLE.

HOTVLEN pohvs! Estimvt hotvle hayvte te? Hesaketvmeset hayvtes. Hotvle momekvs koman hotalet, momet momekvs komofvn fekhonnet omēs. Vnehkvn hotvle hehcvko tis, estvmivlkis vm vfolotet hotalet omes. Mvtvpomen Hesaketvmese nak' omvlkvñ hecet kerret omēs. Ahuyiret vn topvn en kypakvyat cv heces, vtotkvranit, monkat ahkopvn-vranet ayvyat cv hecet, hvtvm wakkvyat cv hecēs. Hesaketvmese nake estomvyat omvlkvñ kerret on omat, nake makvyat kērres. Aeha, opunvkv holwahoken opunayit, momet vretv holwvken arin omat, Hesaketvmese vc vnokecekares.

Ps. 139 :1. "Cehofv toyetskat, vc ofvn cv hopoyet, cv kerretskes.

2 Likit, hvtvm a huervyis cv kerretskes, vm vkerrickv hopvye tis kerretskes.

3 Vn nene, momen vn wakketv tis vm vfolotet, momen vm vretv omvlkvñ vn kerretsket os.

4 Cehofv toyetskat, opunvkv cv tulaswv vtehkat kerretskeko sahsekot ok, omvlkvñ kerretsket omes.

5 Cv yvpvt ot, cv homv tis, vm vfolotetskvtet omes.

6 Nake kerretv *heyv omat* estomahet, vc ohfvnkes; hvlwet omes, mv *oretv* estohmvkos.

7 Estvmvn ahyit, cem Puyfekcv en kypvkar haks, hvtvm estvmvn vletkit, cen renakv en kypvkar haks?

8 Kvwpiket hvlwe-tvlofn eceyvyis, mvn liketskes; totkv-rakko ofvn vn topv hayvye estomis, hecvs, liketskes.

9 Hvthvyvtke e tvrpvn ocit ayit, uehvtkv hopvye
mahan likvyisem;

10 Mvt o estomis cenket cv yvpvyvres, momen
cenkvpervt cv hvlvtvres.

11 Mehenwvn yomucket vc vyokkofvres, makin
omat, nere tis hvyayvket vm vfolotet omvres.

12 Henka, yomucke naked cem ehhekos, momis
nettv omet nere hvyayvket omes; yomucke momen
hvyayvke tepakat momvlkuset *os ce homv*.

23 Vc ofvn cv hopoyvs, Hesaketvmese, momet
cv feken kerrvs, vc ohfvcccecv, momet vm vkerrickvn
kerrvs.

24 Momet hecv, vretv holwvke vc vpiken omat,
momen vyetv emeyuksv sekon cv yvpayet 'svc vyvs."

KE-RAKKO EM VPE.

6 CESVT heyy opunvkv-svhopakvn es ete'm pu-
nayvtes. "Este-hunvnwv hvmket ke-rakkon eme
cvpofv ofvn vhocet ocvtes. Emet vlaket, momet em
etten vhopoyvtes, momet sekon hecvtes.

7 Momof eme cvpofv-vfastvn kicvtes, Hecvs,
heyy ohrolope tutcenat heyy ke-rakko em ette vho-
poyyat vlakit omis, momet sekon hecis. Tvcvs,
estomen ekvnvn yvmahke haks?

8 Momen emet em vyoposket kicvtes, Pucasc,
heyy ohrolopen hvtvm wikvs, vnakvn korrit, vlekwi-
cares.

9 Momen em ette hayen omat *heres*, momen
monkon omat, mv eryupvn tacetskvres."

Vn hesse, cemet ke-rakko Hesaketvmese eme



cvpoīvn hueret ometskes. Momen Hesaketvmese cvpofv Pucase tes. Mvt yvmv ekvnv ofv ce huericet omen, opunvkv-herv vhesaketv Cesvs es vlakvte pohet ometskes. Ohrolope omvlkvn Hesaketvmese fvccetv em etten hayetskren cem etektvnecet omes. Heyv ohrolopet es cen poke tis omepēs. Heyv nakcokucet espoke em penkvlke ofv hueretskat, ce mvhayat tis omepēs. Momet omekv, oketv cem etektvnke munkof, mekusapv hakvs; mometsken omat, nettv espoket vlakof, ece'fvcke tares.

NETTV ESPOKE.

CESVS estvn hiyomat like te? Hesaketvmese em akvpervn likes, momis pu heces, ekvnv oh fulleyat. Mekusapeyat pum pohes, epu'nokecet, pum emekusapet omes. Cesvs yvmv ekvnv hvtvm vlakvr haks? Henka! hvtvm 'rvlvkvres nettv espoke omof, ekvnvn ohfvcccecvranet.

Estuce 'stemerku se hotosuse ont, hvtvm 'rvlvh-kekos. Hvtvm 'rvlaket yekcetv, afvcketv rakken ocet vlvkvres. Nettv espoke omof, em estvlke vacakat vpaken vlvkvres, momof em afvcketv aheckuecvres, haketv hakof. Momen este-hopelkv omvlkvt en haukvkvres, momen omvlkvt psvtkakvte e homvn svpvklvres. Cemeu nettv espoke rakkat omof, aretskvres, momof ekvny totkv es nokrvres, momen sutv holattat omvlkvt sumkvres. Mv nettv rakkat omof, Cesvt este em puyvfekcv omvlkvn ohfvccecvres. Momis estimvt vnokecvt on omat, kievres, "Eceyvs cen Hesaketvmese em afvcketv ofvn." Momis vnokecvkekate, momet holwvyecakvte totkv-rakkon vk hvtvpecvranes, nettv espoke orof. Cesvs hocefkv eteropotten Hesaketvmese emekusvpvks. Hiyomofvn vkvsvmatsket on omat, cem puyvfekcv hesakovres makvtet os.

Cane en Kerkueckv 20:11. "Momen mekko-em-ohliketv rakke hvtken hecvyvnks, momet oh likateu; mv ehomvn ekvny hlvwe esyomat em vkueye-cvnks, momen estvmvn fekhonne tayat sekvnkes.

12 Momen psvtkat lopockuse rakrvke esyomat Hesaketvmese ehomvn svpaklen hecvyvnks; momen nakcokv en hauhakvnks. Momen nakcokv etvt en haukvvnks, mvt hesaketv nakcokvt; momen psvtkat mv nakcokv es cokvte aossen ohfvccakvnks em vtotketv take vcvkvyen.

13 Momen uehvtkv psvtke vk ocvte a wikvnks, momen elkv totkv-rakko tepakat psvtke ocakvte a wikakvnks, momen este vtekat em vtotketv take vcvkvyen ohfvccakvnks.

14 Momen elkv totkv-rakko tepakat vkhvse-

54 MVSKOKE NAKCOKV ESKERRETV.

rakko totkvñ vk pvlatkvnks ; heyvt elkv svhokkolat tes.

15 Momen estimvto estomet nakcokv hesake ofvn es hoccekon omat, vkhvse-rakko totkvñ vk pvlatkvtés.”

Cane en Kerkueckv 21:10. “Puyvfekcv ofvn cv vpahyet, ekvnhlwlwe rakke mahen ’res vc vcemiket, mv tvlofv rakkat cv hecicvnks, Celuslvme tvlofv vcatat hwlwen a hvtapken Hesaketvmese a en kvpaket.

11 Hesaketvmese en hvyayvke ocet, momen en hvyayvket cvto vcake mahat, momet cvto caspv omet, estakheckv en hvyayvke omet.

18 Momen mv em vtohopke caspv es hayvkvtet, momen etvlwv cvtokunaplane mvketeket, estakheckv en hvyayvke omet omvnks.

22 Momen emekusvpkv-cuko mv ofv hecvkvnks, Cehofv Hesaketvmese, yekcetv omvlecat, momen Yvpefikucet emekusvpkv-cukot omekv.

23 Momen mv etvlwv hvse, monkat hvresse tepakat ofv hvyayicvre eyacekot oh hvyayicekot omvnks. Hesaketvmese en hvyayvket oh hvyayicet omekv, momen yvpefikucet mv en hvyayvket omekv.

24 Momen Tvlwvvlke hesahokat en hvyayvke ofvn yvkvpvkvres.

4 Momen Hesaketvmeset eturopuswv eturwv en hvsvhicvres, momen efeknokketv, hvkihketv, elkv tis svnvcomv sekares, nake en homv ocvnke eshoiyv-nepekv.

25 Momen *tohopke* em vhauke nettv estofis vkhottkvté sekares, nere sekot omekv.

27 Momen nake esvholwvyecat, estomet eceyeko tayet omvres. Monkat holwvke este laksylke vtot-

kat, monkat lvksetv hayat, holwvyecvlke esceyekos,
momis Yvpefikuce en nakcokv hesake 'soh cokakat
esceyvres."

HESAKETVMESE ESTOMIS HVMECICET OMES.

1. NERE yomucke herat tis,
Hvmket arvyat hece haks?
Henka, Hesaketvmeset
Neren nettv omen heces.
2. Eturwv omvl' nucicof,
Este vm vnvttceekat,
Nak' mecetvn komvyate,
Mvn momecvko taye haks?
3. Hekos, Hesaketvmese
Est' vketetece munkvt os.
Est' em puyvfekcv omvl'
Mvt heren kerre munkvt os.
4. Vnrvwv este vrvte
Sekan 'rorit, mvn ehkvyis,
Mvt o estomis vn tvlkeks
Cehofvt vm afolotes.
5. Hvlwen afvcket liket os,
Totkv-rakko tis hecet os,
Estomis hvmeccicet os.
'Stomen en letkvko tayes.
6. Momis letkvye tayet os,
'Stvn vyetvn cv kerrices,
Cesvn oh letkvs, cv kices,
Heren vc vcayecvres.

HOPORRENKV PUNVKV.

1:5 Este hoporrenat pohet, nakkerretv ohvtv-layes.

1:17 Cehofv em penkvlkvt hoporrenkv vliceckvt omes; momis este hoporrenvkekak hoporrenkv herat, momet nake emvhahoyat em vlostekot omes.

2:6 Cehofvt hoporrenkv herat emet omekv.

3:5 Cehofvn vfekrvkkvs ce feke 'somvlkvn.

3:7 Cehofvn em penkalet, holwakan en kpv-kvs.

4:14 Este holwvyecv en nene vpihketskvs, momet este holwvyecvlke em vpeyetv vhyetskvs.

4:23 Ce feken omvlkvn vketecet, vcvyecvs, mv aossen hesaketvt omekv.

10:12 Holvckvt etehvnkv hayet omes; momis vnokeckvt holwvyeckv omvlkvn ohranet omes.

10:23 Este hoporrenekat naorketvt es em afvc-ketvt omes; momis este-hunvnwv nak' kerrat hoporenkvn ocet omes.

12:19 Cukhvrpe faccat estofis oce munkv tares, momis etulaswv laksat vkocoknusen omes.

14:9 Hoporrenvkekak naorketv nak' hayakekot omēs.

15:3 Cehofv e turwv hvmeccet omes, holwakat, momet herat hecet *omes*.

16:18 Ekvsvmkvt sumketv ehomvn ayet omes.

16:28 Este-hunvnwv holwvyecv etehvnkv ahocet omes, momen *este* en wswakvt eten hessvlke rakrvken etekvpicet omes.

20:4 Hopuewuce tis nake vfastat es kerke omēs, em vtatkvetv hvsutke tat, momen fvccv tat.

20:13 Nucky vnokehetskvs, estemerkv em vlahke witetskes; ce turwvn en hvwecvs, momen tvklike cem etetayvres.

22:6 Hopuewuce vye tayan emvhayat vfvstvs, momen emet vculis emet en kypahkekos.

SATKV.

NAKCOKV here oh onvyeyvre vrahkv, satkv cokv ofv ocat vtekat omvlkvn kerrvraneyet omes.

Lvtv etohkvlkat punvkvn hayet omes.

Punvkv etohkvlkat svntvns hayet omes.

, Heyv satkv kame kicetvt omes, momen *a* maketv en hofune omen fekhonnetvt omes.

; Heyv satkv semvkolvn kicetvt omes, momen *a a* maketv en hofune omen fekhonnetvt omes.

: Heyv satkv kolvn kicetvt omes, momen *a a a* maketv en hofune omen fekhonnetvt omes.

. Heyv satkv pelevt kicetvt omes, momen *a a a a* maketv en hofune omen fekhonnetvt omes.

— Heyv satkv tas kicetvt omes, vhofune fekhonnetvt omes.

- Heyv satkv hifen kicetvt omes. Heyv satkv opunvkv hokkolen etenrvwvn ocet omes, hvmket opunvkv es wakke hvmke eyuksvt on, hvmkat enhvteceskvt on omat, momet opunvkv hokkolen etehvltet hvmkusen hayet omes. Hiyome, svtv-rakko.

' Heyv satkv cokv, monkat lvtv hvmket sekat kerkuecet omes. Hiyome, nak'.

" " Heyv satkv opunvkv cokv etv aosse tat eskerkv opunvkv eslikv ehomvn eyuksvn tepaken ocet

omes. Monkat este tis ete'm punahoyen omat, este nak' makat vtekat enhvteceskvn eyuksvn tepaken ocet omes.

! Heyv satkv opunvkv, monkat svntvns eyuksvn ocet omes; vkerrickv ayvkhvmkv eskerkvt, momet hvtvm vhofune fekhonnetv eskerkvt omes.

? Heyv satkv nake vpohetv eskerkvt omes.

& Heyv momet, monkat momen maketvt omes.

&c Heyv momen vpvlwv maketvt omes.

() Heyv satkv opunvkv etenrvwvn svsekket omes; opunvkv vpvlwvn kerkuecet omes.

* † ‡ Heyv satkv, heyy cokv elecvn naket ocat eskerket omes.


Svntvns vlicectv, momen este hocefkv, etvlwv hocefkv, hvse hocefkv ltv rakkaten ehomvn licetvt omes. Hiyome, Cane, Rekackv, Uecate, Hvyuce, &c.

Coyetv kerretv ekvny oktahan typeksvhcet eto-kvcken es coyetvt heret omes.

ERKE EPPUCETAKEU.

CEPVNVKE hokkolet welakytes, eckvlke emekusa-pvlket omet, enake ocvket omvtes. Momen heyy cepvnvke escvleckv-pvfnvn vtehket welvketvn eyacvke tates, Nettv-Fekepkvn, momis eckvlket em vkv-svmekates.

Estvtis welvkekot kaken Nettv-Fekepkv orekv, Nettv-Fekepkv estomis escvleckv vtehket welvkeye tayes makaket omis, eckvlket en komeko tetayvtes. Erke vhakv esostan vkerricat, Vntvlkuset Hesaktevmese en nettv vcayecvranin okekates. Momis



evppucetake, cvchustvlke, vm vtotkv-hunvnwv, vtotkv-hokto tis, momen vm wakvlke tis, mv nettv fekvpvranen okvtes, komvtes.

Momekv en cepvnvke nake em 'pohakat em apohicvkekates. Momusen cvpvkhokvtes, momet pume komeyat welakeyvres komakovtes. Momusen uehvtkv perro vk etefullan vhoyepvtes.

Momen sumhokateh, erkenvkv, Cane Kefen kihocet, uehvtkv afopke like tatet on, mvn en kerkuehocvtes, hopoyet, eshecen omat afulhuecetvn komvren kihocvtes. Momekv hopoyet aret, perro 'mehake este vpokan kaken eshecvtes. Momusen ete'm punayvtes, "Fulhokatskat mit cen hervke tayet os," kicet, momis ehvperkvn punayvtes. Nake komakat mit 'sohfvcvren vyekcvke tates. Momekv heyy erkenvkv opunvkv herakuse 'sem punayat Momen oks komaket omis, Mohmeyetvn okhos komkekates. Yefulhokepvre komat em vcalne munkvtes. "Ceckvlke em vkerricky em vhapanuset seho-

ket omatskes," kicvtes. "Vkerrihcvkes," erkenvkvt kicvtes, "Cecketake ece 'hecicvket, cem emekusa-pvken, ohrolope sulket hoyanes. Momen hiyomat em vtotketv tate sohfvcnen es afvckvkvranvte mun-kan, estemerkv min e oh vlvkuecatsken hecat, este-merkv rakke mahan cecke mahvkvu en heckuecet omatskes, kicvtes. Nake 'se naorickv sulke estvma-hen ec oh sumecicvket omat, en feketv hiyomen es em feket omatskes," kicvtes.

Hvmmaket ete'm punayof esmvnettusat, Mon okhos, kont, momusen efeke en kafken hvkihkvties. "Tayen vm mvttet huerit omvyvtet kerris, momen cv feke vm vhopanus" makvtes. Momet fulkepetv vkvsamusvtes.

Momis 'svculicusat vyetv vyekce here munkvtes, opunvkv herakuse 'sem punayet estomehoceko tayvtes. "Escvleckoce vm encahokvnks, momen uehvt-kvn vyetv komvyvnkek, vyvranvyat tvlkus," makvtes. Momet, "Vnen vc vcvk vtes, cv huten, momen perro-cuko tis vpikit, este somusis vretske tayen cen heckuecares" kicet omis, momeko tayvtes. "Cvc-kvlket perro-oh-vtotkvlke ont sumkvnks cv komkvren komikv, perro-oh-vtotkvlke omet vyepares," makvtes. "Momet cem vkerrickvt on omat, vyvnos ce," erkenvkvt kicvtes. "Hesaketvmese ce 'pakvres ce kicet omis, cen naorketv tat ce cakke ocvres. Mo-men Hesaketvmeset cen naorketv esvrahkvn ec oh fvccecvres," kicet, momusen en kvpakvtes.

Momis e cuse tat eckvlken ohfulkepvtes. Momis e rvhv estvn ayat kerkekok' estvn elepvtes, komhoyvtes.

Momyte hofune hakof, mv erkenvkvt vhauken a

em vnaſke ſaſen pohvtes. Momet, vhauke hvwec-hoyen, eſte perro aоſſet aret ohmvtē hecvtes, momen ete'm punayat, "Eſte mvnette hvmket elehocvranen liket, ce hecetvn eyacet on, arit omis," kicvtes. "Mvn hecvkon omat, vc afackuſet cv 'leko tetayes," maket okes, kicvtes.

Hofunusekon erkenvkv perro-cuko vk likan 'rovtes, mont heyy eſte mvnettā vhecihocen liken hecet omis, kerrekot, "Vn hesse toyetskat, cen cv merrus, momis ce kerrvye sekokv, eſtomen vn huehket oketskat kerretvn cv yaces," kicvtes.

"Potſe tvlofvn erkenvkvye tvnkekv, momof cv hecetſkv haks?" "Monks, erkenaketske pohvyyte sekos." "Monkv cv kerretske ſeko haks"? kicvtes. "Ce kerrvks, erkenvkva," makvtes. "Hofunof cepnvke hokkolet ſumhoket welaken eſhecet, Fulhoke-pvks ceckvlke kakan kicet, fulhuecetv komet, em vcahnetske ocekat haks"? kicvtes. "Mucv kerris" kicvtes. "Monkv, heyy cen huehkyat, eſpoken ce te'm punayit, nake 'svn hervren vc ohtohketske cem apohicvko ocvte vtekat, nake vne 'svn hervren vc ohtohketske, cem apohicvko ocvte vtekat, nake vne 'svn hervren oketſkvten mucv kerrit, cen kerkuſet, cen kpvkvetv komit, cen huehket okis," makvtes. "Nake v'mvhayetſkvna cem apohicvyvte! Momis hiyomat vkkerricit eſtohmvkos. Oketv hoyvneps. Vn naorketvt mucv es cv heces. Hesaketvmeſet vc ohfvccet os. Momen, Cv hute vc vcvk vyvs cv kicetſket omis, cem apohicvkot, momen cv hocefkv tis etvn hahyit ayvvyntat, hiyomat eſte vm merrvre ſekon, eſte cv kerre ſekon, cv'lvranaſt os," makvtes. Momusen erkenvkv Kefen, e feke es nok-

kicuset, vpaket em emekusapvtes, momet em vcahnvtes.

Momen momusen oh vkhottphohyen, erkenvkv kvpetvnen te'm punayvtes, "Heyv este mvnette estemerkat estomet hesakeko taye haks"? kicvtes. "Estont hesakeko tetayuset os, mekkvke vhaky hayat, Estimvt heyy naorketv momecen omat, elvres, maketvt omepe tvnken, mv mahusan e oh wikepet omepekv, estohmet hesake tayat kerrēskot os," makvtes. "Momekv hiyomat nakcokv en nene hecet vpoket omes, elecvraneyat," makvtes.

Erkenvkv, Momis Lvntvn tvlofvn vhyit mekkvlke er vhuyirit ete'm punayvyit, hecares, komet ayvtes. Monkv mekkvlke hvmke ehomvn er oret en kerkuecvtes. "Mv este mvnettat en nakvlke tis em onayat estomet hesake tayen omat kerretvn komit arit omis," makvtes. Momis mekko opunvkv em ayoposket, "Elvranen nakcokv ayeciceye hooyvnepekv, estome tayat kerrepvks ce, momis nvkvftvranekv, nake kerkuecetskat kerkuecin, mekko-rakkat pohvres, momen hesayece tayen omat, pohetskres," kicvtes.

Momen erkenvkv 'rvtepēt 'rvlakan mv nettvn mv este elehocvranen pohvtes. Momekv lvpkusen mekko em punvkv vlvkekon omat, hesayecen ome estomis, elvranat tvlkusvtes, oketvt vlvkepekv.

Momet erkenvkv perro oh ayet 'roran, este vculat, efeke en nokkusen, hvkihk, perro en kvpaket ayen hecvtes. Momat mv este cepanat erket ohmvten kerrvtes, espoke eppuce ete'm punayet vseket en kvpaket omvtes. Hesaketvmese em penkvltv mvnettuse tvvv evpvye mekusvpkv-cuko 'soh aye

'sarvnnat aret omvtes. Momen en sumikof tis, 'svrahkv em emekusapvtes, "Hesaketvmese, Estvmvn cvppuce are haks"? maket, momet hiyomat eshēcet omes, svnvcomv teheceko tayet te'n kpvkvranaet tehecvtes. Momusen perro wicket omvtes.

Momis erkenvkv perro 'receyan, elecvranet metetakuehocen 'rorvtes, momusen este mvnettatt yvmv ekvnu en kpahket, Hesaketvmese ehomv er huervranaat vwolicusvtes. Momis hiyome mvketekof hesakvre mekko em punvkv pohiken, hesakvtes, momet nettv sulken erkvlke er vpvkepvtes.

Heyv este mvnettatt erkenvkv ete'm punayan em apohicet, e cugen vcvk fulkvten omat, efeknokketv momvtekat eckvlke oh cvkkuecekvnt os, momet emeu nake holwvke momat e oh cvkkuecekvnt os.

Este mvnettvle nake kihocat apohicekot, nak' herekis e en cakkuecet omēs.

HOKTUCE ENOKKAT.

Mv hoktuce hecetska? Henka, hecis. Enokket ot en topvn oh wakket omes. Ecket em vtvkhvken likes. Momis e'mvniceko tetayus. Cemehkvn, mv hoktuce em vnicetske tetaya? Hekos, estimvt e'mvniceko tayes. Hesaketvmese tulkuset momece tetayes.

Cemet ce nokken, vneu cv nokken, omvlkeyatet pu nokhoket, hofunekon pu pvsvtke tetayet omes.

Momof pun hesse pucke 'sen yekcat pu yacvres, elkv eteropotteyof, epu 'pakvren Pun hesse mvn momece tayat oce te? Henka, oces. Momis fuccvn hopoyēkon omat, eshehcēkos.



HORKOPKV.

“HORKOHPESTKVS,”—vhakv escenvpakat. “Mv horkopvte huerat svnvcomv horkohpats.” Horkopetv naorketv rakke mahet os. Horkopv, Hesaketvmeseme vhakvn, momet este em vhakvn kacet os.

Nake est'enake tokon, est'em esvkatet horkopkvts, momet ehet licvkat kvhakuce en rakke omusis esvkatet horkopkvts, momet corakko en rakke omtekis, momet cvtokunawv rakken licephoyis, e pucase kerrekof cawvkatet horkopkvts.

Momen este horkopv en yekcen ‘sest’ ohfvnkvn-tct, nake sestvpenkylecat sases. Mvu horkopkvts. Momen hvtvm horkopv este elecvntot, nake en ca-wet os. Mvu horkopkvts.

Momen hvtvm estome Hesaketvmese em vhakv en kvceye tayat ocet os. Naket punake tokot sum-

ket liken eshecet, ehset, e pucasen yoh fulecicekot, ēhēn omat horkopvlke toyēs.

Este sulket omes, cokv tis esvhkopanet, monkat corakko tis 'temvrecet, cvtokunawv ete'n horkopaket os. Monkat nake enake tokat tis cvnakets market, tayen laksaket os, momen est'envkerret, nake esaken omat, horkopaket os.


Momen hvtvm este nake wiyet en rahkvn rakke mahan, momvteke oreko estomis, wiyaket es est'em vlakset, horkopvlke haket os.

Momen hvtvm este nake est'em vcayecvranen en wihokof vcayecekot, este'n yvmahkuecet vfvstekon omat, este'n horkope etetayuset os. Momen este enhorre, es e mvnicekat naorket os. Oketv mome yvmahkuecetv tokot os. Oketv vcaket os; monkv estefvccv huerepet oketv fvccvn yvmahkuecekon omat, afackuset os. Momet Hesaketvmesen afvcecicet os.

“Mv horkopvte huerat svnvcomvn horkohpats, momis vtotkekvs, momet nake heran enken 'svtotkekvs, este nake enkusvpkan emetv em etetayvret.” Ef. 4:28.

Horkopkv vtekat Hesaketvmese en homecet os. Horkopvlke momen laksylkeu em vkerrickvn eticet Hesaketvmese oh fulecekon omat, omvlkvt estemer-kvkvranet os.

“Momof mome tares, naoriket omvtet ok, nake sestvpenkylecat, monkat este mvkerre nake heckuecat, monkat nake este'm vcayecvrane em wihokvte, monkat mv nake sumke eshecat est' oh fulecicvres.” Lef. 6:4.



YUPO-YVPE.

NAKE hecetv mvtawvt holwaket heyvn hueres. Yupo-yvpet omes. En rakke tat yupo-lowake en rakke en nvrkvpv oret omes, momis e yupo cvpke vtvrekot omet, cukhvrponvpvt cvpket omes, momet yupo-lowake enute-fvske ocat onkot, yupo onvpvn yvpen ocet omes. Hvmkusis, hvtvm hokkolis ocvket omes, heyvt oce hecatskat omet. E hvcko lvpotlvket oh cvkcvhet omes, momet ele-wesaky tutcenet omes. E hvrpe tvlvswe, cekfet omet, tok-felv mvketek, momet setekelket omes. Re esto-met e hvrpe eteropotteko tayet omes.

Yupo-yvpe Wahvlv ekvnb lekulēhan fuller omēs, momet nake lane ekvnb hontan hompes, pvhē tis, momet etolvte tis, momet em fuller tvlksukhv omet omes.

Cvpakken omat, holwvyecvketv mahet omes, ekvn tis e yvpen es copenet, letket kololuecet arēs.

Fayvlket, elecetvn komen omat, e turwvn 'sen hēcuset echet omes, mvn en rahvkat tvlkuset elecvke tayet omekv.

Cvpvkketv en heretvt omet, cvpvkke omet, senhoneckvket omes. Este-fayv mahhe hvmket opunayat, "Yupo-yvpe cvpvkke etenrvpvko munket, este-papv pale cahkepis mimvn etenrvpvye tayes," makvtes. Momis vntat nake ponvttv honecakat estomis vwolicetv cv yacekot omis, momet ekvnv nake momvke seko likepyyat mit vn heret vc afvcket omes.



CVPOFUCE.

ESTE em vkerrickv cvpofuce omet os, momekv vhericet vfystetvt os. Cvpofucehkvn nake enerkv heren vhochoyekon omat, nake em ette herakat,

pvkpvke herakusat tis mv ofv sekot omes. Momekv cepvnvke, hoklusvke esyome cokv-heckv vpeyen omat, emvhayvlke emvhayat enerkv heran em vkerrickvn em oh vhocet os. Momen vkerrickv holwahokat, momen opunvkv holwahokat, este holwahokatet vtvkrv honte oh svkwecat tes. Heyv vtvkrv vhochoyekis hontet omes, momet estomehocekon omat, pvfnet mahet, nake vhockv herakan ohfvnket, vhopanes.

Momekv herakatet cem mvhmayvkvren ce ya-cvket on omat, nake herakaten hericet vketecet, vkerrickv holwahokan lemet vpvlvtvkes, nak' vhockucen en lemvkvnto etvpomen.

Hesaketvmese em enhonrkv heyv etehoyvnen momecetvn komatsket on omat, ce hoporrenvke tat ece 'fackusvkvres.

HEKOS MAKETVN KERRVS.

HEKOS maketv opunvkv cōtkuset omet omis, vrakkuecvkvre tayes. Momekv este Hekos maketvn 'semunk hayet on omat, estemerkv tis efeknokketv tis, monkat nake en yvmahke tayate tis em momekon hueret omes.

Momekv este nake naorketv tis est'oh yekcice wites, monkat vtotkepvraneyvte tis, oketv yvhmahkusat welvkvkets este pu kice wites; momof Hekos kicvraneyet os. Momekv este pum etohkvlketv t cokv-heckv ofv tis, monkat mekusvpkv ofv tis Wvwaket, vhkopvnkvkets pu kicen omat, Hekos kicvraneyet os. Momet opunvkv holwahoke tis es opun-

ahoyeyvren este pu komet o estomis, Hesaketvmeset pum opunkv omvlkv pohet omat kerrēt, Hekos makvraneyet os.

Este pum etohkvlketv puckvlke tis, monkat pu mvhayvlke tis em apohicēkot, monkat pum etvlvw em vhakv tis kvceyvren, estet pu komet o estomis, pu fekhvmkuset Hekos makvraneyet os.

Nettyeakon kvceyvren ep ohyekcihoce estomis, Hekos makvraneyet os.

Nake tis naoriket are witēn, lvkiset ohrvnvs pu kihoce estomis, "Hekos, estofis fvccvn oponayvyet omvres" makeyan heres. Nake cōtkuset, rakket o estomis punake tokon eseyvren pu komet ep ohyekcihoce estomis, Hesaketvmeset pu hece munkvt omat kerrēt, "Hekos, este horkvpv toyvkares" makvraneyet os.

Uehomen, momet nake este hacece tayen eskeyvren pu komhoyet omen omat, Hekos makvraneyet os. Momet opvnkv tis, pukkechetv tis, posketv tis, corakko setemvrkv tis, cokv-vhkopvnkv tis, monkat uehome esketv sasat tis vpeyeyvren pu komhoye estomis, Hekos makvraneyet os.

Estofis este vpvltake nake holwake vfysteyvren pu komet omes, momet ep ohyekcice wites. Momet o estomis, pu fekhvmkuset Hekos kicet em vyvposkvraneyet os.

Nake holwvke vtekan Hekos maketvn kerreyet on omat, efeknokketv tis nake empenkvlke sulken en kpvket svpvkleyēs.

HVLWE-TVLOFV.

Vn hesse, ce 'tem punvyvranis. Cv feke vhetke tetaye cem puyfekcv cem vnokecyyat, momet hesakepat ce komvyat ohfvccvt nak' vpolkvn cem 'po-hvranis. Cen naorketv cen kvpaket o haks? Cesvs pu Hesayecv ofvn hueretsket o haks? Svnvcomv hecketsket o haks? Yvpefikuce e catvn 'sec okkosket o haks? Heyvn ce monkot omen omat, nak' eti estometske estomis, momet nake estomen ocetske estomis, estohmet estofvn hvlwe-tvlofv er ohretskekos.

Pu Hesayecv vnokēcusat hvmmaket omes; "Este svnvcomvn hecket omekon omat, Hesaketvmese 'me-tvlofv hehcekos." Em atcvke yvpefikuce e catvn 'sokkosket hathakuse hakat Hesaketvmese em ohliketv ehomv 'roricvres.

Ekvnv hvmket on omat, liketv hokkolet omes, hvlwe-tvlofv, Este-nekricv huten tepakuset omes. Heyv hvmkvtekan emeyuksv-sekon likvranetskes. Estomahes! Heyvn vkerricvs, estvni tar haks? Hvlwe-tvlofv etektvnkuset os. Hesaketvmese Ep-pucet fekvtet os, ceyvranetskat. Hesaketvmese em Puyfekcv Hvsatkusat, estofis ce Hesayecvn oh vtepet em etetakepvs ce kice munkyt os.

Hesaketvmese em estvlke, momen puyfekcv vfackakusat Hvlwe-tvlofv ayepetskren eyacakuset os. Este herake hvsvthvke yvmv ekvnb sasat vtekat cem vpvyecet os. Hvlwe tvlofv em vhauke ceme tat ē emvkhotiye witetskes.

Nak' estometskar haks? Nake hvmkuset hvlwe-tvlofv ce yetv ce mvnvttece tayet os, vkvsvmkv ce

Hesayecv vfekrakketv ocetskekate. Hesaketvmese Eppuce oh vkvsametskat, hesaketv yuksv-sekon ocetskvres, momen mvn oh vkvsametskekon omat, estemerky yuksv-sekon ce 'stemerkvres. Hesaketvmese yvmv ekvnv vnokecat rakket omekv, Eppuce vnokēcusat atotvtes, momekv estimvt oh vkvsamen omat, estemeriyekos. Hesaketv yuksv-sekon hesakvres. Hesaketvmese Eppuce ekvnv sumecivranen atotet omekates, pu hesahokvre vrahkvn omvtes.

UEHOME-ESKV.

HEYV este huerat hecetska? Naken eset oma? Enke pvlhvmken fvlaskon 'seset, pvlhvmken halon 'seset, uehomen esket os. Heren e kv-essen, e turwvn, e turofvn, em atcvken, en holwvkvetv omvlkvn en hehcvs. Nake oma? Tayen e estemerricet hueret os. Hvte uehome eskeko huerof, en heckv herusvtes. Momis hiyomat tan nake omat kerryks. Hace mahet este penkylece ont hueret os.

Mvnettvlke, en heckvn vlosticvketvt omvnts. Momen em vpvlaket hecof, vrakkuecvke taren eyacvket omes. E turofv, em atcvke tis, en heckv omvlkvt hervren eyacvket os. Momis este en heckv herusvte tis, uehome-eskv haken omat, momusen omvlkvt en sumket os. E turwvt vkcataken, e turofvu eleske ome en haken, e kv-esse tis, e turofvn a oh pvlatkken, em atcvkeu omvlkvt en lesehvkepen, este onko haket os. Momen este herake fullat vpake vretv eyahcekos, vlesketvn este'n hayvranekv. En hessylkeu omvlkvt en kwpvkaket os. Ha-



cet vlaken omat, hoktvkeu em penkvlaket em pefatket os. Momof e hiwv, en hopuetakeu, naken oce-
kot estemerket tvk vpoket os, uehome esketvt ome-
cicen, cvtokunawv omvlkv pokopekv.

Uehome celayetv penkvlket os. Mv este este-
penkvlece hueran hehcvs! Heren hecv! Uehome
wiyylke opunahoyat pohvyet os. Hecen vpayvko-
fvn este-catvlke em vloste mahats, makaket os.
Hece entvlkusis este-haceckv, uehomen vpakof
svhere mahecet os. Este-cate uehome en cvmpe
mahet omen kerris. Uehome neset esken, cvtoku-

nawvt pokepof, momusen corakko tis este'm ohonayet os, monkat wakv tis sukhv tis, hacē, cen onkv, omvlkvt pokepis, Estohkos, maket os. Hacvlke cuehvranuset, nene-cvpv tis wakken, hechoyet os.

Uehome-eskv ehiwv ocekan herēs, enhvperkvn tayen hokte hervte tis estemerricēt onkv. *Heyv cokv hayvyat, opunvkv fvccvt os, momen hoporrenkvn 'se emvhahoyekvs komit omis.* Hesaketvmese este en heckv here hayvte hiyome e estemerricat fvccv te? Fvccvronkot os. Mv vhakv, “Elehcetskvs” make ocat, este eleckv vsehat etvpomen, puna momecet, elecvranēkon pum vsehet os. Uehomet este sulke mahen pvsvtvtet omes. Estet etelecvvcuks mahoken pohēn omat, uehomet omecicvcuken poheyat sulket os. Mv tvlkusis en holwvketv pum onayet os. “Hesaketvmese en cuko-vcakat toyatskat, momen Hesaketvmese em Puyvfekv Vcakatet ec ofvn vpike tat kerratskeko haks”? Cokv-rakko pu kicet os. Monkv Hesaketvmese em Puyvfekcvt epu 'piket onkv, puna vcayecvraneyet omes. Uehome-eskv ena vcayecekot os. Uehomen tayen eskof, envcofvn em vhapanen, elet os. Momen mv tvlkekot os. Este hace ēlat Hesaketvmese em etvlofv cehyekos, momis totkv-rakkon vk hvtvpkvranet os. Monkv vn hessvlke toyatskat, vhēricet, heyv este hace hueran hēcet, em estemerketvn, momet en naorketvu oh vketecet, estofis Uehome esikatskvs, momet wiyyatskvs; Este elecvts komet, em penkvlet svpvklvks. Momof ece 'fvckvke tares.

“HACVLKE ESTOFVN HESAKETVMSE EM E TVLOFV
ESCEHYEKOS.”

CESVS VC VNOKECES.

1. CESVS vc vnokeces,
Cokv-rakkot cv kices ;
Hopuetake enakets ;
Yekcvkekis, ent yekces.

Vc vnokeces,
Nakcokvt cv kices.

2. Cesvs vñ elvtet os,
En cuko vn haukvren ;
Holwvyeckvn vslecen,
'Mestucet eceyvres.

Vn vnokeces, &c.

3. Cv yekceko estomis,
Vc vnokece munkvts ;
Hvlwen a vfvnnaaket,
Vc vhecice munkvts.

Vc vnokeces, &c.

4. Ekvnvn ropottvyof,
Vc vpake munkvres ;
Vnokecin omate,
Ca'lofvn cv'sepvres.

Vc vnokeces, &c.

ESTVKWVNAYV.

ESTVKWVNAYV kihocat cetto rvkrvke mahet omes.
En cvpke tat estele-vhopakov pale tutcene, pale osta
oret omes. Heyv cetto rvkrakat, vkhvse sasan, mon
kat uevv rvkrvke sasan fullet omes. Uewv vfopke



ehketv here punvttv vk htvpece uevv eske tayan ehket, peteteket likvntot, em vwole tetayen vlakof, oh tasket, e nokwvn em vpvlaket, nokcepelet, elecet omes. Monkat eto huere tis vcemket, oh wakkvntot, naket hoyanen hecof, e hvce eto vpvlvke emunken, a oh tasket, fekhonnict omes. Ef v tis, eco tis, monkat wakvt o estomis nokmelet omes, maho- ket omvnts ce.

Pum ekvnv estvkwnayv sekat epu 'fvcket tyses. Hopuetakuce, htvvm este hoporrenvkekcat, Yv- mv ekvnv fulles makaket, em penkvlvket omes.

ESTEMERKV SEKARES.

1. Hvlwe mimvn mucv
Cesvs mekket likes;
Em estvlke afvckakat
Em vfolotakes.

'Stemerkv sekares,
'Stemerkv sekares,
Hvlwe vnokeckv 'sfvckan
'Stemerkv sekares.

2. Hvyayvhokuset,
 Vhonkytesko tay's;
 Omvl' heren vyhikaket,
 Cesvn vkvsamak's.
 'Stemerky sekares, &c.

3. Hesaketvmese
 En Yvpefikuce
 Kalfyle elehocvten
 Vyvhikaket os.
 'Stemerky sekares, &c.

4. E catvn es nesat
 E vpvyaket os,
 Momekv eslopicuset
 Vyvhikaket os.
 'Stemerky sekares, &c.

5. Puyfekcv Herat,
 Vkvsvmkvn pu'mvs,
 Celuslvme Mucvsaten
 Pumeu vpokyvren
 'Stemerky sekares, &c.

SATKV-TEKVPICV.

ELKV MEYVKSV-SEKO.	HESAKETV MEYUHSV-SEKO.
SUMKETV.	HESAKVTE.
TOTKV-RAKKO.	HVLWE-TVLOFV
YOMUCKE.	HVYAYVKE.
OHTVHIVKVTE.	HESAKETV YUKSV-SEKO.
ESTEMERKV YUKSV-SEKO.	AFVCKETV YUKSV-SEKO.
ESTE-NEKRICV.	HESAKETVMSE.

Este vtekat heyy satkv wakkat em vkvpervn,

monkat em vkvskvnvn huere vlket omes. Momen mv huerat em onvpv opunvkv ocan em estet os.

Vn hessvlke toyatskat, heyy satkv wakkat em vpvlhvmke estoman svpaklatske haks? Hericet ohonayet vketecvkes; opunvkv rvkrvke mahet os. Hvmkat Este-nekricv enakets, momet totkv-rakko estemerkv emeyuksv-sekan 'sayet os. Momen hvmket afvcketv emeyuksv-sekan, Hvlwe tvlofv Hesaketvmese likan er oret os.

Monkv hiyomat heyy satkv em vkvperv Este-nekricv em estet hueretsken omat, lvpken etohwvlvpiket, Hesaketvmese em este hakvs. Este-nekricv vpake hueretv penkylket os, elkv meyuksv-sekan 'sestayet os. Momen sumketv make ocan hueret, mv satkv etohwvlvpiket, Hvlwe-tvlofn er oretvn ce yacet o haks? Hesaketvmese em este mvn vpket hueretvn ce yacet o haks? Momen estomvyatet mv satkv etohwvlapkvyte? maketska? Cesvs eteropotiyet, etohwvlvpkvrancetos. Cesvs em e wikvranetsket os, ce feken e'mvranetsket os. Ceme cem vtotketv ce hesayehcekos. Ceme cem emekuspkv, momet cen yvhiketv eteropotte mv satkv etohwvlvpiketskekos. Momis Cesvs tvlkus, Cesvs tvlkusen em enhonret, emekusapetskof, emet ec evpahyet, mv satkv es ce tohwvlvpkvres. Momof Hesaketvmese em este hakepet ece 'fvcke tares. Cesvs em opunvkv hvmmaket os; "Estimvt vnen a vc oh aten omat, ossihcvkos." Monkv Cesvs oh vyvs. Momof hesaketv meyuksv-sekon, momet afvcketv meyuksv-sekon epoyetskvres. Satkv em vpvlhvmke estoman hueretska?

FEKEPKV-NETTV

FEKEPKV-NETTV ehosekot vcvyecvs; Hesaketvmese nettv epaken vtotke, vhkopvnvraneyat pu'mvtes, momet nettv hvmken cvnakets makvtes. Heyvt Fekepkv-nettv tes. Pu tempunayat, heyvn ce hohsvkates, maket omes.

Momekv estimv en nettv tate kerreyvrēs, momet nake svrahkvn mellvte kerreyof, naken mv nettv ofv vfvstetv tate kerreyvres.

Hesaketvmese en nettv tes. Nettv omvlkvt Hesaketvmese enakets, Hayvtet omet, mvt etekvpaki-cvtet omekv. Hvse nettvn ohfvnkvransen hayvtes, momet hvresse neren ohfvnkvransen hayvtes. Momis Hesaketvmese nettv epakat yvmv ekvnn ohfvc-cvn este emet omvtes. Momekv, "Nettv epaken vtotket, cena em vtotketv omvlkvn momecv," makvtes.

Hesaketvmese makvtes, nettv hvmkat nake omvlkv Hayvte rakke likat vrakkuehocvres. Heyvn makvtet omekv, Cehofv en nettvn kihocet omes.

Hesaketvmese nettv epakate ofvn ekvnn hayvtes, momet nettv eskolvpakan fekepvtes, momet omekv, Fekepkv-nettvn kihocet omes. Este tis, vpuekv tis, vtotkvte wicket, fekapet omes.

Mekusvpkv ohfvccv vkerricvraneyat vrakhvn, heyv nettv hayet omvtes. Fekepkv-nettv orof, este vtotkekot, fekhonnet, mekusvpkv tis vpehoyen hecetyl, pum vkerrickv hvlwe fvccvn vkvwapkēt omes. Pu holwvyecvket omen, pu feke holwahoketvt omekv, mv nettv vcakatet oren, pum vkerrickv mvn oh

hecet omekaten omat, Hesaketvmese likat tis pu hose tayes.

Cehofv en nettv tes. Heyv nettv hvte hvyatkof, Cesvs, elkv a en kwwvpiket, cvto-kôfke osset omvtes. Momekv heyy nettv hvyayakof vtekat, pu Hesayecv vkerricet pum vkerrickv Hesaketvmesen vkwwvpvke tayes, momet Heyv nettv Cehofvt hayvtes, momekv mv ofv vfacket vkvsvmares, makvraneyet os.

Fekepkv-nettv vcayecetv komēn omat, hvte hvyatkof, asvpaklet Hesaketvmese merretv em'pohvraneyet omes.

E vhericeyat, svheremahe nettv yvmahkvranēkot omes. Puna heren vtcecvraneyet omes. Momis pum puyvfekcv mimvt hvsvtketv en heretv ofvn vtcvranet omes. Momekv heyy taten vkerricvraneyet omes.

Fekepkv-nettv vcayeceyat, pum vkerrickv heren vketecvraneyēs. Momet yvñv ekvñv nake ocakat vkerricetv e em vsehvraneyet omes.

Pum vtotketv nak vfystetv svseceyvte omvlkvñ wihket, mv nettv hvmkusat ofv, mekusapet, cokvn hecet, nake pum puyvfekcv ohfvccv ocakat tvlkusen vkerricvraneyet omes.

Etewolen wvnen emekusapet, Hesaketvmese em Puyvfekcv Vcakat epu'paket, pun horkvsvren vpo-hvraneyet omes. Momet este etv heyy nettv es en lopicvkvren mekusapvraneyet omes.

Momeye tayen omat, mekusvpkv oh vpeyet, Hesaketvmese em vhakv heren em apohicvraneyet omes. Mekusapvlke vtekat pu feke vpayet mekusapet, yvhiketv kerrēn omat, yvhihokat, este mvnicvraneyet omes.

Erkenkv opunayat omvlkvñ heren em apohicvraneyet omes. Holwvyeckvn en kpvkves, maken omat, nake estomakan es holwvyecye omen omat, heren vketecvraneyet omes, momet nake vfvtetv estomen wikeyvten omat, mvn kerreyof, momusen, "Hesaketvmese, naorkv toyvyan, vc oh hehcet, vm merrvs," kicvraneyet omes.

Hiyomen nettv yvmahiket omeyisem, nere feke-pvraneyof, mekusapeyat, "Heyv nettv ofv naket pum matten omat, omvlkvñ pun kpvycicvs Cesvs vrah-kvn," kicet, mekusvpvraneyet omes. "Opunkvt ot, vkerrickvt ot, fulletv tateu pum matten omat, omvlkvñ kpicvs," kicet, mekusapeyet omes.

Hiyomen Hesaketvmese en nettv vcakat fullvraneyet omes. Momis estomahes! este nvcomuset hiyomat fullt omes, yvmv tvlofvt on omat.

Este sulke mahet Hesaketvmese en nettv vcakat ehosaket, momekat kerrake estomis, holwvyecvkvet okv, mv nettv kvcaket omes. Momet Hesaketvmese em vhakv hvsatkusat kvcaket, em puyvfekcv estemerke taye ofvn e svpklecahet omes, momen mv estemerkv ofvn vpeye munken omat, elkv yuksv-sekon vpeye tayes.

Mekusvpkv-rakkon este fullisem, sulket opunkv fvccv-hakekon opunahoyet, ehvperkvn nettv, Fe-kepkv-nettv yvmahkakat heceyet omes. Monkat heyy 'sem vheremahis sases. Emekusape 'svphokat tis naoricet omakes. Momis heyy este vkerrickv ocvkeko ome fullte omvlkvñ pvsvtkranet omes. Momet Hesaketvmese ehomv svpaklet ohfvccvranet omes. Momof, "Nettv-vcake hvtvm hvmkasis oce-yate," komvkres.

Totkv-rakko ofvn vpokof, "Aeha! estomen Hesaketvmese em estvlke tvkleceyvtes; momet en nettvu vyvmahkeyvtes; momēskate," makaket, estemerraket hvkihhokvres.

Vn hesse, ceme hiyomat my este toyet̄ka? Aeha! momen omat, mucv vtekat Hesaketvmese en nettv tvklehcetskvs. Merkvn em apohicvs. Hofune mahekon, "Nettv sulke," Hesaketvmese, "cem merre, cem etektvnecvte estomet aretskvt haks?" ce kic̄t, cem'pohvres. Cem puyvfekcv enrahkv sek̄at hesayecetske tayen, ce mehakvtet omvret okv, heyvn kerrvranetsket os. Ce feket mucvse haket omekon omat, estomet heren Hesaketvmese em vhakv vfastet, en Nettv-vcakateu here vfvstetskeko tayes. Ce feket etv haket omen omat, Hesaketvmese em vhakv vtekat vfvstetv ece 'fvcke hak̄s.

Momof Tewe mekko tate oket, "Cen cuko ofv nettv hvmkusis nettv cukpe rakko hvmken es en heres," maketskvres. My omat Fekepkv-nettv vkericetsket o haks?

Em vtotketv omvlkvn em en heretsket ome haks? Momekat Nettv-vcakat cvpke mahet este naorices kometske haks? Yvmv ekvny Fekepkv-nettv hiyome cem momen omat, Hesaketvmese 'me tvlof liketv ce metetakekon omes. Estofis mekusvphoye munkvt omes. Fekepkv yuksv-sekot omes. Momis mv svhopakv yvmv ekvny nettv ohmerhoyvten vlosticetskekon omat, ce feke mucvsen ce yacen omes. Hesaketvmese tvlkuset heyv ce feke mucvset ce'me tayet omes. Em Puyvfekcv Herat ec ohtoten, este mucvset ce haye tayes. Aeha! ce feken e'mvs. Cen holwvyeyckv omvlkvn wihket, Cesvs cv Hesaye-

cv tes komet, oh vyvs. Momof yvmv ekvnv Hesaketvmese em vtotketv ece 'fvcke tares, momvtet ot Hvlwe-este sulkat vpaket, ece 'fvcket, vkvsvmkv yuksv-sekon vyvhiketskvres.

Estvmv hopvye tis Nettv-cako omof vyetv tokot omes, momet hvtvm cukoperice e afvcecicetv tokot omes. Momekv mekusvpkv tis fulleyvten omat, este vwahat momusen pu huten vpeyvraneyet omes. Momet mekusvpkvn vpeyen omat, mv tvlken vkerri-cet, mekusvpkvn rorihcet, fulleyvtet, mekusvpkv ro-pottof, pu huten fulecvraneyet omes. Apuekv tis hopohyekos, Nettv-cako omof, nake eten neseyvte tis, nake etemfvccetv tis opunvyecvranēkot omes.

Merkv vtotketvn vfvstvraneyet omes. Este enok-kan emvnicet, hvtvm este elat hopelet, hvtvm vpue-kv tis elvranat emvniceyet omvranēs. Nake mome-cvraneyat tvlkuse ocakat heyvt mv tes.

“Fekepkv-nettv cele en kpvpyecicet, vn nettv vca-kate ofvn cem afvcketv hopoyetv cele en kpvpyeci-cetsken omat, momet Fekepkv-nettv este afvcecicat, Cehofv enake vcakat, vrakkat tes kicetsken omat, momet Cehofv vrakkuecet, nake kometskat vfvstets-kekcon omat, momet cemet e afvcecicetskekot, cem opunvkv tis opunvyetskekcon omat, Momof Cehofv ofvn e afvcecicetskvres, momen ekvnv hvlhawan ec oh licares, momet Cekvpe cerke enaken ce hompi-cares, Cehofv e cukwvt opunvyvtet omekv.” Es. 58:13, 14.

“Momen vm etohnvkvftetv vtekat em ofvn vm vhakv momet vm opunvkvu vcayecvkvres. Momet Fekepkv-nettvu vrakkuecvkvres.” Ezk. 44:24.



VHAUKEN VKHOTTVS.

Etwv toyetskat, vhauke nvkhottvs ce kivvyof, cv-pvkke here ont a hehcetskvs. Hotalan, Pucat tayen etkolen okis. Ce hesake vtekat vhauke vkhottetske munkv taranat tvlkekv, hiyometan eskerretskan heres.

Estoman oketska? Cokv-heckvn ayit, nakcokvn keriyit, vhakv-hayv hakvranvyet omes. Momvranvtet mometsken omat, vhauke sulken vkhottet este-hununwv here haketskres. Vhauke estomakaten oketskat vm onvyvs, Puca toyetskat. Momat ho-funusekon liketsken, estomēn okvyat cem onvyares.

Enhvteceskv ce hvckot vhaukets. Mvn nake ker-rvkekat pohekaren vkhottvranetsket os. Opunvkv hervkekis, cepvnvke es ce tempunayis, momen este mvnettvle tis nake herekis ce mvhayake wites; mv omakat pohekaren, vkhottvranetsket os. Mvn momecetskekon, ce hvckohauke esceyen omat, Etwv, este vhakv-hayv hakvranvte en heren, ayeko taye hahke wites. Momen ce turwv en hauken hvtvm vkhottvranetsket os. Nakcokv hervkekat tis, mo-

men nakcokv-tyleme holwahokis hecetsken omat, ece hopvne tayekv, mv omvlkvt hecekaren 'mvkhottet herakat tvlken eshecvranetskes. Momen nake herakuse omvke neskv-cukofv nake wiyetv tis oces: mv omakan hecekaren vkhottvs. Mvn momecetskekon omat, cvtokunawv vcayecetv kerrekot, estimvn em merretskeko tayvres.

Ce cukhvrpe 'mvhauke haket vkhottvranat tvlkuset os. Myt ce tulaswv nake hervkeko 'sopunvyvranan 'semvkhottket omekv. Mvn vketece heret ometskvres, mecetskekon omat, opunvkv holwahoke cvpvkhoke tis sossices. Monkv vketecet, hoporrenkv herakan vteloyet sulecetskof, nake herakate min sossicetskvres.

Ce feke ofv vhauken nake ece'nrapat asceyekaren vkhottvranetskes, cem vkerrickv ce feke ofv opunaye ocat vhacke cem vheciuvt, momis mv cem onayan em apohicetskekon omat, nake cem onayvte wikepen ce'stemerike wites.

Monkv vhēricet ce hvcko, momen ce turwv, momen ce cukhvrpe vhauken vkhothuecetsket on omat, naorketv moskometskeko es ce ceye ce'stemerrice tayate sulken 'mvkhottetske tayes.

Momekv vhauke vkhottetv nake vfvstvkvre tatayet os. Yvmv ekvny aretskis, nake cen hervket omes; momen emeyuksv-sekat ofv cen hervren kometsken omat, yvn momecvranetsket os.

VKTOPV.

HEYV nake ocat vktopy tes. Hvcet tikesko taya yet omen, vktopyn hayet omhos. Mv vktopyn oh



huyiret tiketvt os. Eto, tis cvto tis vktopv es hahoyet os. Momis hvcce hymkat ocet os, momen este estomet mvtan, vktopvn hayet, tikeko tayet os. Elkv en hvccet mv tes. Momis Cesvs pum vnicen, mv hvcce tiyeceyes. Mvn em e wikēt, em enhonrēn omat, elkv en hvcce yomuckat roriceyof, mvt epu yvpayet es pu tikvres. Momet mv elkv en hvcce es pu tikof er tvpalv ekvny here mahan 'se pu'yvres, momen mvn vpaket estofis epu 'fvckē tares.

PU FVCKET ETEHECES.

Pu fvcket, epu 'facket
Heyvmvn etehecēs.
'Rolope hoyanatet
Nettv heran 'svlakes.
Heyv afvcketv nettvn
Epu 'facket heces.

Cehofvn vkvsymvks,
Pun hesaketvn pu'mes;
Nake pu 'fvceciat
Nettv omvlkvn pu'mes.
Heyv, etc.

Pu 'facket etehecēs,
Cesvs, epu'nakuecvls,
Pum afvcketv omvl'
Ece 'fvceciate!
Heyv, etc.

Purkylkeu, mvhayylkeu,
Pun hessylke tohylken
Mucv pu 'facket heces,
Monkv yvhikēt okēs.
Heyv, etc.

Monk' pu Hayvten hv̄t̄m
Heren vkvsymvkes;
Pu nesvren Eppuce
Hvmkusat atotvtes.
Heyv, etc.

En 'Yvfekcv Vcakan
 Em 'poheyet on omat,
 Mvn a pun 'totepvres,
 Monkv vkvsvmvkers;
 Heyv, etc.

TEWE WENSLETT.

HECATSKES, Tewe Wenslett e hocefkv^t vliket os, heyyv nakcokv enhvteceskvn. Mv este heren vkerri-catske tayat ce sasvkēs, momet heyyv e hocefkvⁿ hecatskat, este hēret omvten kerratskes.

Momis este sulket heyyv este kerrkvte sekok heyyv nakcokvn hecvkvres, komis. Mv esvrahkvn opunvyecvranis. Mv este mvnettof, Mvskokvlke hopuetake sulket cokv-heckv hiyome em etektvn-kat omekot omvtes. Kawetv mvhakv-cukon likof, nakcokv kerretvn eyacuset on hecat, mvhayvlket, yafke, vtatkety en hoyanof, mvhayaken, kerretvn vlicecepvtes. Heyv 'remohyupv, hopuetake ocehpofvt, em etvlwv mvhayetv eyacat, Tvlvhasse mvhakv-cukon vnakuecuset liket, 'sten kerrepet likvtet os. Momet este-hunvnwv orepet ont, momet em erkenkv, Laklec kicetv, en yvteket o estomis, hopuetake cokv hecat vpake hecetv es e yatuecekot omvtes. Momet hvtvm here kerre mahat mvhayv Lapvse tepaket. "Mvskoke en Nakcokv es Kerretv Enhvteceskv" tohtvlhuecakof, mvhayv etvt nakcokv Klamv kicetvn emvhayen, heren er kerre mahet omvtes.

Heyvn ce kicvkis, esti toyatsket, estvmvn hue-

ratske estomis, ce mvnettet ot, ece'culet o estomis, heyy este arvte omet, kerretvn vcevllatske munkvres, komit okis.

Hoporrenkv vrakkuecet omekv, estofis este vpv-lwv 'sem vcahnet, 'sem vnicetv eyace einunkvt omvtes. En helvpket o estomis, cokv-heckv ocat vfek-honnet, em apohicet, momet em vcahnet omvtes. Heyvn mv omvkes.

Este vnokecat omecicen, lvpken nakcokv en heckvkepyren komet, vnickv es naorekatet omes. Nettv vrahkv Laklec emvnicen cokv tohtvlhuecen en hoyanof, vpvltake cokv lopuckuce hayetv emvnicet omvtes.

Vhvmkv, cokv "Cesvs a oh vtes" semvwetene-puehocvren tetakuecetvn pu yacet ofvn, yeceyvntvs, mohmet "Rvro em vkwikvn cv kihocen, 'Vc vevkv-peyatsken, este em vkwiyvlken ce hayvkares' Cesvs makvten vkerricvyis," makvntvs, momet pu mvnicvntvs.

Erkenake 'mapohicakat, Cesvs vnokeckv, momet este vnokeckvu e feke fäckuset omen, hecakvtet omes. Turopuswv e turwv fäckusen, Cesvs em estemerkyte em onayet, "Cesvs vnokecepvks," makvtet omes. Em vretv omvlkvt este vnokece tat kerkuecet omvtes, momen este vnrapv nvcome mahat tates, komvyet omis. Moman erkenkv Pvknv éle oh erkenakof, hesake hueroft, este vnrapv oceko mahat omvtes, makvtet omes.

Pucase en huehkvrana em etetake taret kome munkvt omvtes. Hvyakpon etehoyanet aret, este tvk elehocvtet omen vkerricet, vyecicet, yvhiketv 161 tetakuecet, e hute er ohret, cokv es hayvtet omes.

'Renyupvn opunykv Cokv-Rakko asossen yvhiketv
160 coyvtet omes.

Monkv, espoke enokkof, Vlekcv Heckak hecvtet,
"Em eyuksv mahlvpvtketvt omvnks," maket cokv
pum atotvtet omes.

Monkv mv omatskvren ce kicvkvyct omes.

Hoporrenkv hopokv mv omatsvres.

Heyv cem onvyvkvyat omvlkvn mv omatskvres.

Este emvnicky mv omatskvres.

Cesvs vnokecetv uv omatskvres.

Este omvlkv vnokecetyl, momet Cesvs 'soh ayetv
kometv mv omatskvres.

"Pucaset cen huehkes" mahokof, vm etetake
tares, komet, estofis vketecce huervte omatskvres, ce
kicvkit 'respoysis.

Kvco-hvse nettv 17, ohrolope 1862 ofvn, yvmv
ekvnv en kpahket, fekvpkv Pucase 'metetakuecv-
ten eceyepvtet omes.

"Este-faccv em elkvn cv'lekvs, momen vm eyuk-
svt mv enake omekvs."

H V Y A T K O F T E H E C E Y V R E S.

HVLWE mimvn hvyatkof teheceyvres,

Monkv ce 'fackvkekvs;

Afvcketv emeyuksv sekaten

Ahonec'yvres.

Mvn vhauke 'stofis vkhottkekares;

Mvn hesaketyl etot huerepes;

Mvn hesalokvte vpokes;

Mvt pu hute tares.

Hvlwe mimvn hvyatkof teheceyvres,
Monkv ce 'fackvkekvs.

Hecvks! oketvt pvnfnen hoyvnepet os,
Teheceyvres.

Mvn vhauke, etc.

Hvlwe mimvn hvyatkof teheceyvres,
Monkv ce 'fackvkekvs;

Pun hessvlke pu homvn vpeyvtet
Pu 'mehaket os.

Mvn vhauke, etc.

Hvlwe mimvn hvyatkof teheceyvres,
Monkv ce 'fackvkekvs;

Enokketv, estemerkvu šekares;
Fekvpeyvres.

Mvn vhauke, etc.

Hvlwe mimvn hvyatkof teheceyvres,
Monkv ce 'fackvkekvs.

Cesvs pu Nesv vpake toveyvres
Meyuksv-sekan.

Mvn vhauke, etc.